



C40  
4514  
(77)



此不熱

C40-4514

丁翁年譜大歲及有  
家書置之武武紫雲山  
我微笑塔院府中未  
為學者不敢許武院內  
當山二世鐵牛機謹誌



B 64853

龍華懺儀序

明進士贊治尹中議大夫原任兩京兵刑部

尚書郎廣東湖廣等處按察僉事致仕奉

恩詔晉勲階正四品婁江管志道撰

當余隆慶壬申春承乏留曹得大慧果集閱之不  
禁擊節時有一張叟者譚及十方三世之故問果  
公再來否余曰來何啻再正不知歷幾僧祇耳又  
問再來仍有此機鋒否余曰此來隱宗而顯行止  
眼曰大亦帶教以明宗越一紀為萬曆甲申余既  
臺嶼真觀從天池山舜鑑庵為千松得漁師護講

臺知其傳法師爲萬松林公也。一曰道及萬松因地曰大人亦知吾師是大慧之後身乎。余因前有億逆驚起問其行實。千松一一道之。千松亦稱其法子哉。獨疑千松法嗣在何而千松既逝有天台象先清公弟子幻爲惺師法門之麟角也。得衣鉢於清公。復從千松請益。楞嚴及究達磨之道。聲稱藉藉。以乙未春偶會於吳門尹山寺。余窺其行止。個儻解行俱邁。等夷一等心竊疑曰。此非千松之法子乎。別去數稔。連以所刻佛法金湯編諸書相質。丁未春仲來吳。又以所撰龍華懺儀十有二條。

起自開發正信。終於念一實相。請曰。世有二三大心。凡不肯作解脫漢。甘於五濁中擬竊釋迦老子肘後符直欲向龍華納彌勒敗闕長者。其何吝數語爲鎧胄乎。余旣高師之見地。而又壯大心菩薩之信根。開卷讀之。不禁踊躍大槩。因世之獨尊淨土。而且專恃彌陀。乃不察慈氏之見居兜率度人疾入不退之位。於道旣捷且穩。不從此處游。薩婆若海而孤仗九品。遠迎此非諸佛所望於大心衆生之意也。此念甚嚴。此見甚正。然其所剖孰爲豎出三界。孰爲橫出三界。孰爲卽三界。孰爲出三界。孰

爲離三界而出三界孰爲不卽不離而出三界出三界中又判其孰爲兼提三乘之權教孰爲單提一乘之實教一乘教中又判孰爲開權顯寔之漸門孰爲廢權歸寔之圓門因而約主約機分四殊勝其爲衆生開龍華三會真因可謂旣明且切而無遺漏矣然吾以蓮經實相覈之則此十二條者在幻師猶屬權說非寔說也人孰不厭漸修之爲拙而豈知漸者頓之因唯除未廻心之一闡提外更無一人不以刹那入佛地者人孰不欣頓悟頓證之爲超而豈知頓者漸之階唯除最初威音王

以前更無一人不以三祇成佛果者此中消息非過孔聖朝聞夕可之闢而知命從心以上境界難言矣幻師旣虞中下士之信極樂而疑龍華又虞上上士之尊龍華而卑極樂故語多回護而修辭則欲兩逗儒釋之機故意多圓活亦有之吾儕孔氏之徒也孔子以乾元爲上達之道岸以坤元爲下學之正因則於彌陀彌勒等法不但並行不悖而且一以貫之其何欣何厭乎哉稽孔子之現行實欲立達衆生入不退地豈非合文殊智普賢行而圓修之者學者果於下學生達闡中有得耶雖

不問彌陀彌勒二尊法界可矣然其法非吾心外法也其道亦非夫子一以貫之外之道也彌陀誠與此土有緣而盡虛空界之淨土則何可勝數隨緣隨願何所不可若論到乘龍御天安貞應地之易道則此時正當雙林之既往龍華之將來而孔宗峙立於其間彌勒殆收釋尊與孔聖度未盡之兒孫而胥度之者則今日之奉孔規正所以植龍華之因而後日之禮龍華未必非竟尼父未竟之志也幻師於是乎起余不淺矣故爲之序時萬曆歲在丁未春仲之吉書於吳門惕若齋

龍華懺儀政語

夫真性湛然本無生佛之名靈心圓爾曷有根塵之迹特由迷悟之一心遂感昇沉之十界因善惡之殊途受安危之異趣所以輪迴永劫解脫無期故我

迦文不離寂光土而示現受生頓舍金輪王而方便成道觀機稱性創說華嚴指彼大心乘遮那之本智入華藏之圓門然其聾啞之機別當俯就是以頓掩一實漸啓三根四諦十二緣六度三三昧既遊般若堪駕白牛終令人佛知見也始末化緣

音華懺儀 政記  
大略如斯而已。嗟乎末法。違真世遠。去聖時遙。凡情熾而法義微。聖道迂而業繩繁。故諸古德。始開懺摩一門。意令滌舊染而受新薰耳。切觀諸家懺式。詳略不一。獨

蕭梁所集者。曲盡人情。委明懺意。以故流通斯世。得其益者。深且博也。至於

天台家所集。辭禮尚約。宗旨惟圓。或一七日。或三七日。卽獲聖靈。往往而應。固一家之良規。末學之善導也。萬曆丙午歲。天台慈雲懺主。幻爲惺公。按觀彌勒上生等經。集龍華懺儀四卷。列十二門。爲

後學勸。始事而終理。條貫有法。外權而內實。凡聖非遙。理能成事。念念而不異真心。事得理融。門門而無非實相。實相緣生。罪福無性。緣生無性。寂光常現。智也。惑也。心如境如。是名真實懺悔。亦名究竟懺悔。所謂事懺摩。理懺摩。不離當人之念。身恭敬。口恭敬。寧越自己之心。誠末運之慈航。昏衢之法炬也。幸哉鑑也。忝斯微質。良遇法乘。旣登鷲嶺之壇。復預龍華之會。願身塵刹。深報佛恩。在欲行禪。當家獲聖。更何欣厭於心哉。由是募衆。剞劂。以公同志云耳。昔

明萬曆庚戌歲佛成道日橋李楞嚴寺後學沙門  
如鑑撰

得遇龍華修證懺儀卷第一

天台山慈雲寺傳教觀沙門如惺撰

世有聞彌勒世尊龍華說法之事卽乃束之高  
閣聽其自然得遇如視囊中物耳可不哀乎此  
其不知三會所度先有定限如初會度者九十  
六億人二三兩會各減其二焉知我等不假一  
行一願必預於是耶是惑之甚也若有大心衆  
生欲於未來身居雞頭莊嚴之城日遊金色如  
掌之地享八萬歲之長壽翫四大藏之富饒得  
與優伽輪王詣龍華見彌勒成阿羅漢證無生

忍。於賢劫諸佛次第受記者。當勤修此十二方便。命終必定先生內院。獲觀白臺。入不退地。然後隨佛下生。度諸同類。此非一超直入如來地者歟。今依諸大乘經。及法住記。述此懺法。用結勝緣。惟願見聞隨喜。務勸流通。弗以人廢教也。

第一開發正信

第二廣求良友

第三嚴持戒律

第四發菩提心

第五明結壇儀

第六禮請三寶

第七懺悔往罪

第八專誦法華

第九三寶福田

第十總觀兜率

第十一別觀龍華

第十二念一實相

第一開發正信

夫如來出世所說八萬法門。皆以誘引衆生出離火宅。坐白牛車。入佛知見也。自教法東。被大乘根



龍華備 卷之二  
器碁布星分徧樹法幢傳佛慧命方今去聖逾遙  
魔軍熾盛賴有淨土一門流通五濁心佛並顯若  
海津梁但教有明文往生匪一有教生妙喜佛國  
見阿閼如來者有教生琉璃世界見藥師光佛者  
有教生安養見阿彌陀等者此離三界而出三界  
名橫出三界者也有教自五停心等破四住惑生  
同居土見三藏佛者有教修歷別三觀破十二品  
無明證十二地如華嚴初地至十地等覺妙覺是也生實報土見舍  
那身者有教圓觀三諦頓破五住煩惱住首楞嚴  
三昧生寂光土見毘盧法身者此卽三界而出三

界名豎出三界者也有教生兜率陀天見彌勒聞  
不退法者此不卽不離出三界者也於戲門類旣  
多逗機不一機教有異非辯何以標心今以彌勒  
對他方佛殊勝略計有四先約王次約機約王又  
二先約一佛次約諸佛

先約一佛者上說橫豎二途諸佛功德金口親宣  
亦何優劣特爲彌陀此有緣故龍樹等諸大菩薩  
或造論發明或以身先衆令人信受據彌陀經云  
過西方十萬億國土有世界名曰極樂彼土有佛  
號阿彌陀是知去此娑婆十萬億刹方是彌陀化

龍華傳傳  
境以佛願力。衆生善根彈指可到。實推其量。與此方終遠。彌勒爲釋尊補處。千佛衣法繩承鶴林。示寂。賴是菩薩種種方便。滌我塵襟。引遇龍華授與道記。其悲心願力。不下彌陀。又現居兜率。與我同在欲界舉頭便是。最近最親。是爲第一殊勝也。次約諸佛者。衆生願生他方佛土。彼方教主。或遣化佛。化諸菩薩。放光接引。若求生內院。則彌勒菩薩。與無量天子。圍遶親迎。是爲第二殊勝也。約機亦二。先辯離卽之異。次辯見佛遲速。離卽者。若欲求生他土。必須離此火宅。就彼清涼。上根之

人。雖知生卽無生。而未證法忍。不無欣厭。況中下者乎。生內院者。乃卽此三界。不染三界。亦不見界內毫法。可取可捨。是故不勞欣厭。便覩白毫。所以經云。若有衆生不厭生死。樂生天者。欲爲彌勒。作弟子者。心身精進。不求斷結。乃至發弘誓願。命終之後。譬如壯士。屈伸臂頃。卽得往生兜率陀天。於蓮華上結跏趺坐。是爲第三殊勝也。

次辯見佛遲速者。西方有九品之階。上品卽得見

佛。其中下二品。或經數日。數劫。然後華開。

無量壽佛經說

上上品。生卽見佛。上中品。經宿華開。上下品。一日一夜華開。七日乃得見佛。中上品。華壽開。不說見

龍華傳 佛中上品七日華鬘經半劫成阿羅漢。中下品七日遇觀音勢至過一小劫成阿羅漢。下上品七日華敷下中品六劫華敷。下下品滿十二大劫蓮華方開。生內院者方坐蓮華。卽見彌勒。故經云未來世中諸衆生等聞是菩薩大悲名稱禮拜繫念此人命欲終時菩薩放白毫光與諸天子雨曼陀羅華來迎此人。須臾得生值遇彌勒頭面禮敬。未舉頭頃便得聞法。於無上道得不退轉。是爲第四殊勝也。

是皆釋尊苦口勸諭令生兜率。我等若不遵依。如母在傍慈愛誠切。其子愚故視若路人。甘自逃亡。不肯親近。母雖誘引。子疾他逝。所謂可憐愍者是也。

也而今而後凡諸行人有乘釋尊慈力加被發心者。有因閱彌勒上生下生成佛等經願生者。有誦法華普賢勸發品心生信樂者。應當一心精進。依此勤脩。篤行忠孝慈心不殺度脫一切。我說此人雖居苦海本是大乘不退根。曾於過去無量無邊諸佛法中種諸善根發無上願。得入此門。入此門故名法王子。雖處煩惱如優曇華於一念頃游諸三昧。卽此四大便是藥王。能療一切八倒苦疾。口發片語成光明幢心所思惟皆大法聚。不思議藏。施捨無窮。爲般若船渡諸淪溺。文殊普賢是其

韻華傳傳 卷之二  
勝友一念發心登不退位直超實所不入化城龍  
華道場爲唱導首十方國土徧供河沙成就如來  
無上知覺三世諸佛歎莫能窮

或謂昔有天親無著師子覺三大菩薩相率求生  
內院師子覺先生竟住外院不見彌勒天台智者  
大師造十疑論因指兜率爲難極樂則易執爲難  
者是不知人性不齊因緣自別也如夾山棄教歸  
禪立登祖席玄奘捨性習相名冠殊方臨濟二遭  
痛棒悟在大愚長慶七破蒲團捲簾始徹是皆緣  
有所關初非義有勝劣是藥皆可治病善醫何必

執方所以往生上生皆從厥志遠接近接等一悲  
光今雖讚述稱揚俾生信受逗機設教理或皆然  
若疑此有外院安養得無疑城是乃行者自迷非  
佛力有差殊也况外院疑城一皆真慈所化特使  
處此令漸見佛孰以王舍三億之徒而譏瞿曇耶  
或謂疑城有進無退外院福盡轉輪者是不知此  
天有二岐路也有等衆生聞大乘教求上生者第  
爲信根未純菩薩悲心寄生外院俟其淳熟令見  
白毫是比疑城僉云不退別有一類凡夫天人不  
聞大法偏修小乘及外道未到地定惟冀昇進不

諳無生。如無聞比丘。福盡輪轉。若謂安養有九品之階。故三乘畢托。兜率惟說不退法門。則位非鴻漸。得無隘乎。是不知心之妙。土之化也。佛本無生。九界生故。佛界亦生。是故凡夫以業感而生。諸佛以無緣慈而生。菩薩以願力而生。業感之生。不特三惡。苦緣三善。亦苦緣也。無緣之生。不特四土爲淨。土七趣皆淨土也。普賢爲薄荷畜道。卽淨土。觀音爲面然鬼趣。卽淨土。調達入油鍋地獄。卽淨土。故谷泉禪師涅槃偈云。今朝六月六。谷泉受罪足。不是上天堂。便是入地獄。遂叉手立化。是等若垂天之翮。奚鴻漸能拘之。願力之生。於安養有九兜率亦有三也。一有願有行。得生如天親菩薩等。有求生之行。二有行無願。得生如章安尊者等。及禪教諸師。不歸淨土者。多生此天。三有願無行。得生如白樂天居士等。凡於釋迦法中。精一戒勤一行。一念稱名者。除百千萬億劫生死之罪。得生內院。否則龍華會上。亦得道記。所謂綱而絕流。何隘之有。古云。要知佛法義。當觀時節因緣。所以緣在彌陀。彌勒不得不教。生安養。緣在彌勒。彌陀不得不勸。遇龍華。今之人壽至短。劫近刀兵。人壽減將十歲。刀兵劫起。

龍華懺儀

今人壽當六十。與徵瑞應於石城。萬曆丙午冬。仲

刀兵劫不遠矣。城山石彌勒像。足生五色優曇華。人心洽於緇素。人因法末。皆慕龍華。兜率

之教得不興乎。偈云。彌勒真彌勒。化身千百億。時時示世人。時人自不識。

或謂往生安養得遇果佛。是稱殊勝。彌勒既居補處。位在等覺後心。望彼彌陀尚隔一間。何勝有哉。是不知佛智之難思也。經云。惟佛與佛。乃能究盡。故大智聲聞不退。菩薩盡思度量所不能知。且十方諸佛。諸大菩薩。皆住不思議如幻三昧。互為主伴。度脫眾生。是故七佛祖師。尚稱曼殊童子。樂邦

補處。孰非正法如來。淨土穢土。誠實相之空花。大身小身。乃寂光之鏡像。釋迦既稱古佛。彌勒獨曰新成。當以聖人。不思議幻破我夢心。則我無始夢心。應時化為無上知覺。以幻修幻。乃曰真修。請以信歸。無勞辭辯。  
弟子盛廣所施刻

○第二廣求良友

世間有非常之事。必有非常之人。有非常之人。乃能為非常之事。是故如來說最上乘法。是有最上乘之器。以當之。若權小之機。必墜涯而退。法華五千之徒。信不誣矣。所以欲聞龍華之道者。當擇大

龍華傳集 卷之二  
心行人爲我同願同行之益友。互相砥礪。則心鏡愈明。不復中躓。經云。善知識者是大因緣。是以藥王藥上世爲昆季之親。提婆達多實造釋迦之道雪峰。非巖頭終難悟徹智者。因南嶽易得心開。譬夫蓬性曲也。或生蔴中而自直。苟質短也。苟托樛木而布雲。若投再棘之壁於糞壤。則連城之貨必毀。徙芝蘭之種於魚肆。則襲衣之香亦滅。楞嚴云。一不清淨。衆不成就。友道之難可不慎乎。法華三昧儀止許十人。已還恐人之衆。有不肖者廁焉。今稍寬其數。多則二十五人。爲二十五圓通也。次則

爲十二圓覺。其有宰官居士及善男子入社者。聽亦例數內。獨尼與優婆夷。一不許入。有願修者。聽於尼寺尼精舍。自依法結壇修之。

然二十五人務求其行朴志銳者。不必禪講俱通。今之善於講者。多放浪不羈。入則恐排攪淨衆。有善通於禪講。尤能虛謹謙光。力修其苦者。此又爲我之上座矣。

弟子鍾廣鎔施刻

○第三嚴持戒律

器淨堪貯醍醐。芽焦不生甘露。照乘之珠。不產於溝壑。運尺之璧。必蘊於崑崙。况不思議無上善法。

前集備錄 卷一  
九  
不修尸羅而能荷擔者乎。我等生值斯世。魔子羣聚。假我衣服。凌滅正法。作師子蟲。若不精持波羅提木叉。何異彼魔。妄稱釋子也。故破戒之人。如處覆盆。三光不燭。白毫普照。非彼所緣。五千大鬼。掃其腳跡。諸天善人。如避糞穢。善芽焦殞。宿福日消。結火城。因非法王種。縱使發無上心。如欲魯而之。楚北轅。而南其轍矣。故上生經是。優波離請佛所說。意重戒也。經云。應持五戒。八齋具足戒。又云。佛滅度後。四部弟子。欲生兜率天者。持佛禁戒。一日至七日。思念十善。行十善道。以是義故。特與行者。

首約三章。

第一。須於衆中。擇一臘高德。茂素所信。重曾於菩薩戒法師前受戒者。與我爲授戒師。或於如來降生。成道涅槃歡喜日。無論已受未受。一皆與授。十重四十八輕戒。已受者作增進上因。未受者開正知見。

第二。日日於世尊前。身着千佛大衣。誦菩薩心地品。一遍。令輕重法相了然在心。如握貫珠。斯須不失。

第三。自旣得戒。復當展轉授受。無窮。或自與受。或



前華嚴傳 卷二  
勉從師與說持犯開遮深義。俾心開意解。入諸佛位。若衆中無堪戒師者。得於佛菩薩形像前。自誓受戒。如梵網經說。有堪作戒師。戒師尤當虛己自謙。弗倚師尊。忽諸耆德。必以如幻三昧。彼此交賞。共出生死。稍執人我。便落羣邪。非三昧友也。應於朔望布薩。二時受食。或應供之際。一依臘坐。苟越其次。經中所謂兵奴外道之法也。有等朝得圓顛。暮躡大僧之上。自云我年老。大彼等後生。既違佛制。宜擯黜之。

所云持犯開遮者。聲聞止持作犯。菩薩止犯作持。開者。大乘許見機得作遮者。小乘不許見機。

一皆禁止。此皆備在天台戒疏。

嘉興楞嚴寺比丘如鑑助梓

### ○第四發菩提心

依苦集滅道四諦發四弘誓願也。衆生常淪苦海。外道終是苦因者。皆由不知上求下化之道也。不知上求。則凌人傲物。妄自尊大。不知下化。則惟知有己。不見有人。於是廣造深愆。墜諸沉溺。輪轉七趣。如蟻循環。二乘雖能習空。出離三界。不發心故。爲空所縛。所以菩薩萬行。諸佛二嚴。非彼所有。是故我等欲生內院。值遇龍華。應發無上道心。廓其方寸。於生死海。作大寶筏。自渡渡人。彼此共濟。經

音全備  
二云若有比丘愛敬無上菩提心者當作是觀是知  
菩提心爲龍華之要道也十方諸佛諸大菩薩昔  
爲凡夫由發心故所得道疾能發心者則慈通覺  
海悲等含生曼殊普賢心精溜合不起本座垂形  
萬象四弘誓願者第一依苦諦發誓言衆生無邊  
願度此未度者令度也第二依集諦發誓言煩惱  
無盡願斷此未解者令解也是二大願王名曰下  
化第三依道諦發誓言法門無量願學此未安者  
令安也第四依滅諦發誓言佛道無上願成此未  
得涅槃者令得涅槃也是二大願王名曰上求以

上求故折我高心則無得少爲足之嫌如善財童  
子是矣以下化故祛我慢心則無獨善之陋如常  
不輕菩薩是矣仰之則無法不聞俯之則無善不  
克以之入三途無非淨域推之化十類總曰親姻  
火宅原自清涼結使非今解脫仗此娑婆竿木暢  
我法曲梨園或厭苦而翺翔吾知必無用武之地  
故此四誓乃諸佛降伏魔軍之勇將破生死怨敵  
之前鋒爍五陰昏衢之明燈具萬善功德之如意  
是故行者當於未入懺前七日方便晝夜六時對  
釋迦像前然臂然指燒衆名香胡跪合掌五體投

前卒慎簡

卷一

三

地內懷喜悅發殷重心。目盼金容意澄不散。首者執香

鑪衆同聲白云

南無釋迦牟尼世尊。無上正偏知覺文殊。普賢諸法王子。法身常住。佛眼普觀。憐愍有情。現為我證。我依大乘甚深海藏。普為一切發菩提心。求生內院。得見龍華。聞正法輪。親承道記。願番加被。令我成就。白已五體投地復胡跪首者一人先唱衆和

無邊衆生誓願度

無盡煩惱誓願斷

無量法門誓願學

無上佛道誓願成

或三唱或七唱多寡隨意宜四願畢齊云願已歸命禮三寶。叫首起作三皈

若行者心欲廣發衆願。如法藏藥師等者。當依諸大乘經論。如梵網經之類。自製成文。或於怡山中峰。王山谷諸願畧。加損益。備通已志。亦可。但不可廢前四誓。前四願為諸願之根本。故也。諸佛菩薩種種大願。不過敷演前四而已。行者既發心。已諸佛護念。堪入道場。必使此菩提心。念念無間。心心不忘。即此凡軀。打成千佛。大弘願海也。

弟子	姚廣望	沈廣現
頌性甚	徐性津	尼廣度
范性浦	劉性淵	施翽
吳性源	顧性淨	

得遇龍華脩證懺儀卷之一

終

得遇龍華脩證懺儀卷第二

天台山慈雲寺傳教觀沙門如惺撰

○第五明結壇儀

此中境觀與諸三昧有所不同故其壇儀不得不異。既依法華為龍華之本須結二壇。一為普賢道場。一為彌勒道場。普賢道場令脩法華懺。彌勒道場惟發願求生內院。若寺宇精舍迫窄一壇亦足。但於彌勒像前別敷一座安供法華經。一須清淨莊嚴。其彌勒道場所事。或補處像頭戴天冠。身著瓔珞。如天王相。依上生經說。或設當來佛像。如越

之新昌石城石佛卽慈氏像也其餘壇法一依法

華三昧儀及修懺要旨云云

法華懺儀云當於閒靜之處嚴治一室以爲道場別安自坐之處令與道場有隔於道場中墊好高座安置法華經一部亦不必須安形像舍利并餘經典安施旛蓋種種供養具於入道場日清晨之時當淨掃地香湯灌灑香泥塗地然種種諸香油散種種華及諸末香燒衆名香供養三寶備於已力所辦傾心盡意極令嚴淨云云初入道場當以香湯沐浴着淨潔衣若大衣於後若出道場至不淨處當脫去淨衣着故衣所爲事竟當更洗浴着本淨衣入道場行事也

壇儀既設六時行道當想此道場卽是毘盧遮那莊嚴樓閣亦卽五百億天子與牢度跋提窟神願

力所造兜率陀天宮及善法堂等無有異十方諸佛彌勒化身八部鬼神充滿其內一一佛前皆有我身脩諸佛事我此色身卽大法聚此道場量等於虛空一切莊嚴難思難盡縱出他事常令此想念念現前

又復諸經三昧雖曰萬異千殊約之不出四種而已一常行二常坐三半行半坐四非行非坐常行三昧者出般舟經亦云佛立三昧九十日爲期常坐三昧出文殊問般若經亦云一行三昧亦九十日爲期半行半坐三昧卽方等法華等經或七日

前李惟信 卷三  
或十日或三七日爲期而無定限非行非坐三昧  
卽請觀音等經亦云隨自意三昧凡不專於行坐  
者並屬此攝今此懺法卽第三半行半坐三昧攝  
也依彌勒上生經當七日爲期經言一日乃至七  
日云若依法華當三七日爲期經言於三七日  
中應一心精進然所立之期限雖延促有所不齊  
亦乃隨行人心量優劣之何如耳或如思大禪師  
六年常坐或有一生脩常不輕行及四安樂行等  
此以促爲延也或如智者大師初入普賢道場便  
見靈山儼然未散又如慈雲尊者脩般舟三昧期

限未終卽能悟入此以延爲促也。

又遠則如十方調御僉以三祇百劫爲期近則古  
人或以悟或以畢命爲期者貴在破障顯理一息  
能越三祇苟或滯相迷宗沙劫猶稱錯亂斟酌脩  
之無泥俗軌

東禪寺比丘海奉助贊刻

○第六請禮三寶

諸佛身相充滿法界衆生心淨佛卽現前第爲行  
人方結道場凡心未格故令初日第一時誠心伸  
請仰求加被庶獲速破三障入不退地也他日當  
去請佛一法但用讚佛禮拜宣五悔文又前總禮

三寶及散華法六時皆當行之。若或時促。每日初時決不可缺。須求諸異花香。必使香烟花氣交

變如雲供養三寶

法華懺云。初入道場。至法座前。先敷尼師檀。正身倚立。應先慈

念一切眾生。欲與救度。次當起殷重心。慚愧懇懺。存想如來。三寶。曼塞十方。虛空。影現道場。是時手執香。纏繞眾名香。散種種花供養三寶。五體投地。口自唱言。

一切恭敬

一心敬禮十方常住佛

一拜。此下俱有用心方法。如彼

儀說

一心敬禮十方常住法

一拜

一心敬禮十方常住僧

一拜

禮竟。即當胡跪。右膝着地。正身威儀。一心燒香散華。端身正意。口自唱言。

嚴持香花。如法供養。願此香花雲。徧滿十方界。供

養佛經法。并菩薩聲聞緣覺眾。及一切天仙。受用

作佛事。

當運心想。此香花於念中。徧至十方。一切佛土。作種種眾寶莊嚴。諸臺樓觀。上妙諸色。作種種妓樂。上妙音聲歌頌讚嘆。作種種瓶

種。沉水。上妙諸香。作種種餽膳湯藥。上妙眾味。作種種衣服瓔珞流泉浴池。上妙諸觸。作眾禪定智慧。清淨衣相。上妙法門。皆悉充滿法界。以為佛事。

供養十方三世諸佛。一切三寶。普願三寶攝受。亦熏一切眾生。發菩提心。於一一佛前。悉見已身。如此供養等。無有異。又願六道四生。悉入我供養法界海中。了知如是供養。悉從心生。無有自性。心不取着。此念成已。即五體投地。口自唱言。

供養已一切恭敬

應更燒香奉請三寶。請法。當運

請。不得散亂輕心。

心正對所請。口稱名字。如法奉

一心奉請南無本師釋迦牟尼佛想佛法身猶如虛空無去來相

應我奉請從者闍崛山與大眾圍繞來到道場如水中月受我供養餘一切佛亦復如是隨心想念

一心奉請南無過去多寶佛想多寶佛塔從地涌出影現道場受我供

養

一心奉請南無釋迦牟尼十方分身佛想分身諸佛悉皆雲

集眾寶樹下受我供養

一心奉請南無當來彌勒佛想如釋迦塵點劫前已成佛道為度我等

故示居補處當來龍華樹下成無上覺今現我前受我供養

一心奉請南無妙法蓮華中三世一切諸佛想過去日月燈明佛等現在淨華宿王智佛等未來華光佛等皆悉現前受我供養

未

一心奉請南無十方一切常住佛想十方諸佛各各相好具足放

大光明大眾圍繞來此道場受我供養

一心奉請南無大乘妙法蓮華上生經及下生成

佛經等想甚深秘密法藏悉

一心奉請南無十方一切常住法想十方諸佛所證甚深法藏悉

現道場受我供養

一心奉請南無文殊師利菩薩摩訶薩想乘獅子與無量菩

薩圍繞來此道場受我供養

一心奉請南無普賢菩薩摩訶薩想乘白象王與無量菩薩圍繞

來此道場受我供養法華三昧以此菩薩為懺悔王故列在後今龍華以彌勒為王故應在前



一心奉請南無藥王菩薩藥上菩薩摩訶薩 一  
運心

想念  
如前

一心奉請南無觀世音菩薩無盡意菩薩摩訶薩

一心奉請南無妙音菩薩華德菩薩摩訶薩

一心奉請南無常精進菩薩得大勢菩薩摩訶薩

一心奉請南無大樂說菩薩智積菩薩摩訶薩

一心奉請南無宿王華菩薩勇施菩薩持地菩薩

摩訶薩

一心奉請南無下方上行意等無邊阿僧祇菩薩

信士 張名升 助刻  
妻鍾氏

摩訶薩

一心奉請南無現居兜率陀天宮補處彌勒菩薩

摩訶薩 想此菩薩形如天王相好具足放大悲光  
明與無量天子天女各執諸供養具前後  
圍繞乘天宮殿自兜率陀  
天來降道場受我供養

一心奉請南無兜率宮中天親等一切不退菩薩

摩訶薩 想兜率內院如天親等皆不退地菩薩無  
量無邊圍繞彌勒來降道場受我供養

一心奉請南無優波離舍利弗等諸大聲聞普及

十方一切常住僧 想靈山大衆十方聖賢如雲  
而集來到道場受我供養

一心奉請妙法蓮華經中一切天龍八部人非人

等各及眷屬

一心奉請兜率陀天中五百億天子牢度跋提天

神及五大神等一切天子天女各及眷屬如是一稱名

奉請必滿三遍請竟首者  
執鑿與衆起立口自宣言

惟願本師釋迦牟尼世尊慈氏善逝一切諸佛大  
慈大悲受我奉請來到道場

大乘妙法蓮華經彌勒菩薩上生經及下生成佛  
等經哀憫覆護受我奉請來到道場

文殊普賢彌勒菩薩優波離舍利弗等一切聖衆  
悉皆慈悲受我奉請來到道場一切天龍八部兜

率陀天天子天女牢度跋提諸天神衆悉生哀愍  
受我奉請來到道場是諸聖衆願悉證明我今欲

爲十方一切六道衆生脩行大乘無上菩提破一

切障道重罪願得法華三昧於念念中廣脩三寶

福田命終上生兜率內院親覩彌勒菩薩眉間白

毫大人相光聞妙法輪證不退轉於一念中普度

十方六道一切衆生隨從彌勒菩薩下生閻浮於

龍華菩提樹下成正覺時我等與僊佉王及諸臣  
佐脩諸供養勸轉法輪聞三會法成阿羅漢悟無  
生忍得受道記更得供養賢劫諸佛盡未來際一  
切世尊悉皆承事無空過者於一一佛前廣脩萬  
行利益衆生成究竟道仰願彌勒菩薩及一切三

寶以本願力受我懺悔成就所願云云既白願已復當五體

投地起立正身威儀面向法座燒香散花口自宣偈讚嘆并諸呪願

正徧知者兩足尊 天人世間無與等

十方世尊甚希有 無上最勝良福田

其供養者生天上 未來解脫住涅槃

稽首無比大精進 稽首慈悲大導師

偈讚佛已當唱願言

以此歎佛功德脩行大乘無上善根奉福上界天  
龍八部大梵天王三十三天閻羅五道六齋八王  
行病鬼王各及眷屬此土神祇僧伽藍內護正法

者又爲今

上皇帝儲君后妃內外大臣率土民庶師僧父母

善惡知識造寺檀越十方信施廣及法界衆生願

藉此善根平等熏修功德智慧二種莊嚴同會無

生成種智道當了知身口意業充滿法界讚歎二

身威儀次第禮前所請三寶禮法當隨所禮諸佛

志心念佛法身等虛空量應物現形如對目前受

我禮拜當知我之身心本自空寂無有我身相因空

寂故亦能影現法界一一佛前悉有我身相因空

禮一切諸佛菩薩聲聞悉如是心想復更燒香稱

名禮拜晝夜六時所禮三寶皆如下列無異

一心敬禮本師釋迦牟尼佛

想云能禮所禮性空

我此道場如帝珠釋迦如來影現中我身影現釋

迦前頭頂接足歸命禮下去諸佛菩薩各隨其名

自改云某佛如來影現中。我身影現某佛前云云。

一心敬禮過去多寶佛

一心敬禮十方分身釋迦牟尼佛

一心敬禮當來彌勒尊佛

一心敬禮東方善德佛等十方十佛

一心敬禮法華經中過去日月燈明佛大通智勝佛等一切過去諸佛

一心敬禮過去莊嚴劫千佛七佛世尊盡十方過去一切諸佛

弟子 浦海經 朱海潮貫刻

一心敬禮法華經中現在宿王華智佛寶威德上

王佛寺一切現在諸佛

一心敬禮法華經中東方阿閼佛須彌頂佛等八方十六王子現在諸佛

一心敬禮現在賢劫千佛盡十方現在一切諸佛

一心敬禮法華經中未來華光佛具足千萬光相佛等一切未來諸佛

一心敬禮未來星宿劫千佛盡十方未來一切諸佛

一心敬禮十方世界舍利尊像支提妙塔多寶如來全身寶塔

佛

來全身寶塔

龍華情義

一心敬禮大乘妙法蓮華經彌勒菩薩上生兜率陀天經彌勒下生經及成佛經等十方一切尊經十二部真淨法寶

一心敬禮文殊師利菩薩摩訶薩

一心敬禮普賢菩薩摩訶薩

一心敬禮藥王菩薩藥上菩薩摩訶薩

一心敬禮觀世音菩薩無盡意菩薩摩訶薩

一心敬禮妙音菩薩華德菩薩摩訶薩

一心敬禮常精進菩薩得大勢菩薩摩訶薩

一心敬禮大樂說菩薩智積菩薩摩訶薩

一心敬禮宿王華菩薩持地菩薩摩訶薩

一心敬禮下方上行意等無邊阿僧祇菩薩摩訶薩

一心敬禮優波離舍利弗阿難等一切諸大聲聞

衆

一心敬禮十方諸大權菩薩及聲聞緣覺得道賢

聖僧

一心敬禮現居兜率陀天宮彌勒菩薩摩訶薩

應三禮此菩薩是龍華道場主故行者當誠心的對此菩薩胡跪說悔衆罪發大誓願等其餘諸佛菩薩悉作證明普放慈光加被行者所願成就

○第七懺悔往罪

前華懺備 卷一  
行者既禮佛竟。正身威儀。燒香散花。存想三寶。爰  
塞虛空。彌勒菩薩。無量天子。眷屬圍繞。常住我前。  
是故我今。當爲衆生。行懺悔法。所以者何。蓋我與  
法界一切衆生。無始昏迷。隨逐六根。造十惡業。沉  
淪苦趣。受報萬殊。長夜冥冥。少出還溺。可不悲夫。  
然罪性雖空。果報不失。能以 卽空而悔罪。若片  
雪點於紅鑪。依以修真。類方珠向杓杲日。故十方  
諸佛。稱懺威力。名曰健兒。則何事不辦也。今對  
三寶。雨淚悲泣。說六根罪。口自唱云。普爲四恩三  
有。及法界衆生。悉願斷除三障。歸命懺悔。一拜復  
跪默運

逆順十心。然後比丘某甲。及法界衆生。至心懺悔。

我與一切衆生。從無始世來。無明所覆。顛倒迷惑。  
而六根三業。不善廣造。衆罪眼貪。諸色以着色。故  
貪愛諸塵。以愛塵。故受女人身。世世生處。惑着諸  
色。色壞我眼。爲恩愛奴。故色使我經歷三界。爲此  
弊使盲無所見。耳逐外聲。造種種罪。聞妙音時。心  
生惑着。聞惡聲時。起百八種煩惱。賊害如此。惡耳  
報得惡事。恒聞惡聲。顛倒聽故。當墮惡道。邊地邪  
見。不聞正法。處處惑着。無暫停時。鼻貪香氣。若男  
女肴膳。種種香。迷惑不了。動諸結使。諸煩惱賊。

卧者皆起。無量罪業因此增長。以貪香故。分別諸識處。處染着。墮落生死。受諸苦報。舌貪諸味。損害衆生。破諸禁戒。開放逸門。妄言綺語。惡口兩舌。誹謗三寶。讚說邪見。說無益語。闢構壞亂法說。非法非法說法。諸惡業刺斷正法輪。從舌根起。於非義中。多端強說。如此等罪。無量無邊。身着諸觸。造種種罪。所謂男女身分。柔輒細滑。一切諸觸。顛倒不了。煩惱熾然。起三不善。謂殺盜淫。與諸衆生。作大冤結。造逆破戒。乃至焚毀塔寺。用三寶物。無有羞耻。意貪諸法。狂愚不了。隨所緣境。起貪瞋癡。如是

邪念能生十惡五逆重罪。猶如猿猴。亦如羈膠。處處貪着。徧至六情根中。如是六根惡業徧滿三界。二十五有一切生處。亦能增長無明老死。十二苦事。八邪八難。無不經歷。惡業果報無量無邊。說不可盡。十方諸佛。常在世間。法音不絕。妙香充塞。法味盈空。放淨光明。照觸一切。常住妙理。徧滿虛空。我無始來。六根內盲。三業昏闇。不見不聞。不覺不知。以是因緣。長淪生死。經歷惡道。百千萬劫。永無出期。經云。釋迦牟尼名毘盧遮那徧一切處。當知一切諸法。悉是佛法。妄想分別。受諸熱惱。是則於

菩提中見不清淨於解脫中而起纏縛今始覺悟  
生重慚愧生大怖畏誦持大乘甚深海藏歸向彌  
勒菩薩及一切世尊燒香散花發露懺悔不敢覆  
藏以是因緣令我與法界衆生六根三業所起一  
切衆惡已起今起未來應起自作教他見聞隨喜  
若憶不憶若疑不疑若覆若露畢竟清淨懺悔已歸命禮  
三寶晝夜六時每當三說若時促則一說亦可次行勸請法比丘某甲與法界  
衆生至心勸請十方世界無量佛唯願久住轉法  
輪含靈抱識還本淨然後如來歸常住彌勒聖尊  
成正覺我與王臣諸大衆勸轉無上微妙輪三會

授記度我等勸請已歸命禮三寶或三比丘某甲

與法界衆生至心隨喜諸佛菩薩諸功德凡夫靜

亂有相善漏與無漏一切業我今一一咸隨喜隨喜

三業所修一切善供養十方恒沙佛虛空衆生盡

未來願乘此福求佛道面向已歸命禮三寶次行發願法行者當念我與衆

生無始至今雖勤衆善及諸禪定以不發願故則

善無所歸不得勝妙解脫所以十方諸佛諸大菩

薩所有功德悉依普賢願王而得建立是故我心

修諸三昧及懺悔業亦依普賢發大誓願一心胡

比丘某甲普爲法界一切衆生發廣大願我等雖



龍華懺儀  
卷三  
生末法值遇聖世興隆三寶聞大乘教知有彌勒  
菩薩受一生記現居兜率當來補處此世界中成  
無上覺於龍華菩提樹下三會度生以是因緣心  
生信樂發菩提心不捨娑婆不求斷結依性空智  
修諸善根讀誦大乘甚深法藏受持禁戒不缺威  
儀三寶福田一如教種稱念彌勒大悲洪名燒衆  
名香妙華供養晝夜六時行深三昧以此功德與  
諸衆生誓願先生兜率內院次遇龍華惟願彌勒  
世尊釋迦文佛一切三寶現爲我證慈力加被悲  
光照我令我所懺清淨所願成就於臨命終時無

諸疾苦正念現前如入禪定親見彌勒菩薩現大  
人相放白毫光與諸天子作天妓樂持衆天花來  
迎接我我如壯士屈伸臂頃卽得上生兜率陀天  
於蓮華上結加趺坐聞諸天子讚言善哉令我皈  
依天主彌勒我於爾時諦觀白毫卽得超越百千  
億劫生死重罪菩薩爲說無上妙法令我堅固不  
退轉於菩提道心頓入百千三昧然後隨從菩薩  
下生閻浮超頭末城爲聖眷屬或爲王子臣佐吏  
民長者居士淨行六師種種方便化諸同類彌勒  
成道我等隨儂佉王先往勸請轉法輪龍華初會聞

微妙法。悟無生。忍得菩提記。亦得承事供養賢劫諸佛。於星宿劫。普及十方。未來一切諸佛。世尊當現世間。我悉供養。得受記別。又願自今。已往盡未來際。具大行願。神通辯才。現法界身。隨類說法。度脫一切無邊衆生。令成佛道。無有窮極。虛空界盡。衆生界盡。業與煩惱。或使有盡。我此願王。終無有盡。發願已歸命禮三寶。時促則一時。時寬則三。多少皆隨心。宣竟。三叩首。行者既發願已。當生大歡喜。得生內院。決定得見龍華。受菩提記於念念中。令此願王。常得現前。如我慈母。不捨左右。一切善法。依之而修。命終之際。諸業消散。唯此願王。作大導師。引我上生。聞不退法。乃至究竟果海。賴此而成。我發願故。如渡有船。如跛得仗。種種喻說。終不可盡。於三界獄。得大無畏。無常

發鬼不敢正視我於普賢氣脉交接衆生道中作大醫王。既入法流。當自慶幸。既發願已。復當一心。正身威儀。右遶法座。燒香散花。安庠徐步。心念三寶。嬰塞道場。皆有我身。旋遶供養。稱云。

南無十方佛 南無十方法 南無十方僧

南無釋迦牟尼佛 南無多寶佛

南無釋迦牟尼分身佛 南無當來彌勒佛

南無妙法蓮華經 南無下生成佛經

南無文殊師利菩薩 南無普賢菩薩

南無彌勒菩薩 三稱已。復立本位。正心威儀。燒衆

率陀天。經或安樂行品。或普賢勸發品。應須高聲朗誦。不緩不急。字字分明。非但了此聲相。及與身心。如響如幻。如雲如影。文當覺聲。全稱法性。法性徧故。我聲亦徧。十方法界。供養三寶。普及衆生。咸

令開悟發菩提心若誦經畢復更燒香右遶稱念南無彌勒菩薩或百聲或千聲多少隨意伏作三歸依法當一心正念口自稱云

自歸依佛當願衆生體解大道發無上心

自歸依法當願衆生深入經藏智慧如海

自歸依僧當願衆生統理大衆一切無闕和南聖

衆作三歸已此爲六時中一時佛事竟行者當至坐禪處隨意取便調息片時復着淨衣及僧伽梨誦法華經法華三昧儀六時俱在道場內誦蓋止十人已還則人少可也今多至二十五人縱使道場寬博亦須別設誦經處前在道場內已立誦上生經今於道場外坐讀法華經前或誦安樂行或普賢勸發一品而已今讀一卷二卷或全部

有此不同但誦經處不可太遠道場須使切近行者誦聲作頃俱如前作想供養三寶三昧儀必先已誦妙法蓮華經一部通利此中行人既衆則利

鈍難齊似不必成誦但精熟全文使句逗朗然不紊然誦誦之方不可惟時喃喃唇吻當默會義趣久久自然得入旋陀羅尼又六時中於晝三時當讀誦妙經於夜三時惟上生經或安樂行則止須專坐禪令觀行成就入不思議境也

第八專誦法華

有三義故令專誦也一者龍華如海殊途同歸一

何擇焉第恐行人志趣不一所適靡定所以散善

日馳則精一之心蕩矣且令制心一緣如射墜的

正成一片道體易彰二者法華自曰經王孰能超

勝三者此經首因彌勒示疑終則普賢勸發經說

若有人受持讀誦解其義趣是人命終爲千佛授

龍華懺儀 卷三  
手。令不恐怖。不墮惡趣。卽往兜率天上。彌勒菩薩所。彌勒菩薩有三十二相。大菩薩衆所共圍遶。有百千萬億天女眷屬。而於中生。有如是等功德利益。是故智者應當一心自書。若使人書。受持讀誦。正憶念。如說修行。有此義故。令其專誦。但持經有三品人。亦須料揀。一者。文義具足。爲上品。如馬鳴龍樹諸大乘論師及天台智者等是也。二者。心達其義。不諳於文。爲中品。如曹溪六祖等是也。三者。唯精於文。而昧於義。爲下品。如法達和尚等是也。又有二種讀誦。一具足誦。二不具足誦。具足誦者。

全部成誦。不具足誦者。亦各分誦。如教專持安樂行。一品是也。有等行人。無讀誦性。如誦帚比丘。今樂見彌勒。但強持一四句偈。亦謂分誦。若據法師品云。聞妙法華經。一偈一句。乃至一念。隨喜者。我皆與授記。當得阿耨菩提。則知全分功德等無量也。

得遇龍華修證懺儀卷之二終

佛弟子

陸如成  
陳文寵

發心施貲刻

繡水錢士明沐手謹書

海寧縣北寺  
頤象比丘

得遇龍華修證懺儀卷第三

天台山慈雲寺傳教觀沙門如惺撰

○第九三寶福田

上教專誦法華乃依普賢勸發品也今令廣修三寶福田乃依法住記也二說既異須開二門所謂輻輳並進莊嚴本有法身也又彌勒上生等經俱有廣修之義彌陀經云福德因緣得生彼國求生兜率及與龍華不修萬行可乎法住記云若諸國王大臣長者居士男女一切施主於今釋迦牟尼佛正法中能為佛事自種善根或教他種謂以七

寶金銀真珠璧玉香材鍮石銅鐵木石泥土或以  
繒縷或以彩畫作佛形像及率堵波若大若小乃  
至最小如指節量或以香花諸妙供具若多若少  
而爲供養彼由如是善根力故至彌勒如來成正  
覺時善得人身於彼佛第一會中以淨信心捨俗  
出家淨除鬚髮披着法服既預聖衆隨宿願力便  
得涅槃是名第一爲佛事故種善根者所得果報  
若諸國王及以臣庶一切施主於今釋迦牟尼佛  
正法中能爲法事自種善根或教他種謂於大乘  
素怛纜藏所有甚深空性相應諸大乘經云乃

至有能於四句頌若自誦若教他誦若自讀若教  
他讀若自持若教他持若自解說若教他解說或  
於法師恭敬供養或於經卷恭敬供養等由如是  
等善根力故至彌勒如來成正覺時善得人身於  
彼第二會中以淨信心捨離家法出趣非家淨除  
鬚髮披着法服既預聖衆隨宿願力便得涅槃是  
名第二爲法事故種善根者所得果報若諸國王  
及臣庶等一切施主於今釋迦牟尼佛正法中能  
爲僧事自種善根或教他種謂諸苾芻苾芻尼衆  
或次第請或隨緣請於月一日或月八日或十五

音華情論 卷三  
日設齋供養。或往寺中。若供養一。若供養衆。或作  
給侍。或有供養修靜慮者。或有供養諸說法者。或  
見有人欲於正法學習流布。從師聽受。不作留難。  
施其所安。無令怯退。或設五年無遮施會。或施四  
方僧。施寺舍。及坐卧具。或施鐘磬園林等類。供養  
僧衆。彼由如是善根力。故至彌勒。如來成正覺時。  
善得人身。於彼佛第三會中。以淨信心捨離家法。  
出趣非家。淨除鬚髮。被着法服。既預聖衆。隨宿願  
力。便得涅槃。是名第三爲僧事。故種善根者所得  
果報。又彌勒下生經云。爾時彌勒佛見諸大衆作

是念言。今諸人等。不以生天樂故。亦復不爲今世  
樂故。來至我所。但爲涅槃常樂因緣。是諸人等。皆  
於佛法中。種諸善根。釋迦牟尼遣來付我。是故今  
者。皆至我所。我今受之。是諸人等。或以讀誦。分別  
決定。修妬路。毘尼。阿毘曇藏。修諸功德。來至我所。  
或以衣食。施人持戒智慧。修此功德。來至我所。或  
以旛蓋華香。供養於佛。修此功德。來至我所。或以  
布施持齋。修習慈心。行此功德。來至我所。或爲苦  
惱衆生。令其得樂。修此功德。來至我所。或以持戒  
忍辱。修清淨慈。以此功德。來至我所。或以施僧常

食齋講設會供養飯食修此功德來至我所或以  
持戒多聞修行禪定無漏智慧以此功德來至我  
所或有起塔供養舍利以此功德來至我所善哉  
釋迦牟尼佛能善教化如是等百千萬億衆生令  
至我所彌勒佛如是三稱讚釋迦牟尼佛然後說  
法而作是言汝等衆生能爲難事於彼惡世貪欲  
瞋恚愚癡迷惑短命人中能修持戒作諸功德甚  
爲希有。

比丘如霖助刻

行者聞是當生愛樂依經而修決定得遇龍華  
三會復須先明台宗性具法門然後依性起修  
則法法稱性性體叵測故事事難思酌水獻華  
成功德聚修有爲善卽無漏因故云一爲無量

無量爲一。毛端王刹塵裏法輪。法爾自然非假  
神力。非唯性善如是。則彼逆修亦成解脫。所以  
提婆調達應記天王。故我山家一性具門永異  
諸說。願諸同志進則當如善財。一生直造普賢  
行海。退則須學永明晝夜一百八事。卽此  
幻體。便是功德。山王何慮龍華不稱佛子。

### ○第十總觀兜率

彌勒上生經云。閻浮提歲數五十六億萬歲。爾乃  
下生。是知人間壽短。彌勒來遲。若不先生內院而  
竟托龍華者。所謂見郊而求時夜也。况今值斯滅  
劫。壽若蜉蝣。圓教住前尚多退轉。如舍利弗我等  
初心久處五濁。不致顛躓者。耶。是故當誓畢命爲  
期。一息尚存。須勉一息精進。勤修此法。早願上生。



前華嚴論 卷三  
四  
得觀眉毫證不退地。其於龍華彈指可遘。所謂五十六億萬歲者。如轉燭矣。故知兜率爲我化城。不亦宜乎。又此南洲人壽固短。多是大乘根器所聚。若能砥礪進修。則三昧易成。大事可辦。非若他方動經塵劫。始得心開。故諸天子願言。我今持是無價寶珠天冠。爲供養大心衆生。故此人來世不久當成阿耨菩提。旣稱彌勒爲大心衆生。則知非大心者。不堪爲其眷屬。是故我等當廓幽襟於六合之外。融法界於方寸之內。以生死海爲安宅。秉煩惱障爲燈明。不見有涅槃可入。亦不見有三界可

出。必如善財先發廣大道心。然後得見毘盧樓閣種種難思事也。又行者欲觀兜率。應知彼天莊嚴等事。雖是五百億天子及牢度神願力所化。悉由十方諸佛如幻三摩提及彌勒菩薩惟心識定慈心三昧之所成就。又况十方諸佛彌勒菩薩。與我能觀之心同一實相。故云心佛衆生三無差別。如是知已。然後跌坐。一一諦觀彼天勝妙莊嚴也。

○分四。初觀依報。二觀正報。三觀上生。四結稱名獲益。初於入定。三種離觀。觀心若成。三各互具。如鼎三足。摩醯三眼。舉一卽三。非離非合。以法華如

實相智照之一。一全體法界。言如實相智者。卽圓  
頓三止觀也。山家教觀十界色心皆依十乘觀法  
第一觀不思議境。謂觀現起一念妄心。三千具足  
卽空。卽假。卽中。二真正發菩提心。依上妙境發四  
弘誓也。三善巧安心止觀。謂照而常寂。各止寂而  
常照。曰觀。依前妙境起斯止觀。還以妙觀照前境  
也。四破法徧破。卽一心三觀。法是一念三惑。以圓  
觀照之。無惑不破。五識通塞。謂六蔽三惑爲塞。六  
度三觀爲通。六道品調適於三十七無作道品調  
停而入也。七對治助開。謂修正觀多障。圓理不開

須別修事相助之。如五停心。六度等是也。八知位次。謂六卽五十五菩提路等淺深了然。免增上慢也。九能安忍。謂於逆順諸境。安心不動。自五品位入六根清淨也。十無法愛。謂諸行人。旣入六根相似理顯。莫生愛着。須直入初住見實理也。如是十法爲逗三根。若上上根人。第一則足。何須用九。今觀兜率若依若正。卽不思議。故須一心三觀觀之。  
○初觀依報。又二。初正觀。

彌勒菩薩上生經云。爾時兜率陀天上有五百億天子。一一天子皆修甚深檀波羅密。爲供養一生

補處菩薩故以天福力造作宮殿各各脫身旃檀  
摩尼寶冠長跪合掌發是願言我今持是無價寶  
珠及以天冠爲供養大心衆生故此人來世不久  
當成阿耨多羅三藐三菩提我於彼佛莊嚴國界  
得受記者令我寶冠化成供具如是諸天子等各  
各長跪發弘誓願亦復如是時諸天子作是願已  
是諸寶冠化作五百萬億寶宮一一寶宮有七重  
垣一一垣七寶所成一一出五百億光明一一光  
明中有五百億蓮華一一蓮華化作五百億七寶  
行樹一一樹葉有五百億寶色一一寶色有五百

億閻浮檀金光一一閻浮檀金光中出五百億諸  
天寶女一一寶女住立樹下執百億寶無數瓔珞  
出妙音樂時音樂中演說不退轉法輪之行其樹  
生果如玻瓈色一切衆色入玻瓈色中是諸光明  
右旋宛轉流出衆音演說大慈大悲法一一垣墻  
高六十二由旬厚十四由旬五百億龍王圍繞此  
垣一一龍王雨五百億七寶行樹莊嚴垣上自然  
有風吹動此樹樹相振觸演說苦空無常無我諸

波羅密

此由五百億天子依甚深般若而行檀度  
故檀亦稱甚深也由甚深力而能變造度  
率內院所以一一莊嚴事皆巨測以檀依般若  
能攝諸度度度五具法法難思故自天子至於

七寶行樹其數皆五。此觀若成卽能圓伏五生類。猶證入五品觀行位也。亦名乾慧地。楞嚴經云。執心虛明。純是智慧。慧性明圓。登十方界。此非依般若而行。檀度耶。又云。乾有其慧。名乾慧地。欲習初乾。未與如來法流。水接。此下則入十信位也。

爾時此宮有一大神名牢度跋提。卽從座起。徧禮十方佛。發弘誓願。若我福德。應爲彌勒菩薩。造善法堂。令我額上自然出珠。旣發願已。額上自然出百億寶珠。璫璃玻瓈。一切衆色。無不具足。如紫紺摩尼。表裏映徹。此摩尼珠。廻旋空中。化爲四十九重微妙寶宮。一一欄楯。萬億梵摩尼。所共合成。諸欄楯間。自然化生九億天子。五百億天女。一一天

子手中。化生無量億萬七寶蓮華。一一蓮華上。有無量億光。其光明中。具諸樂器。如是天樂。不鼓自鳴。此聲出時。諸女自然執衆樂器。競起歌舞。所詠歌音。演說十善。四弘誓願。諸天聞者。皆發無上道心。時諸垣中。有八色璫璃渠。一一渠有五百億寶珠。而用合成。一一渠中有八味水。八色具足。其水上湧。繞梁棟。間於四門外。化生四華。水出華中。如寶華流。一一華上有二十四天女。身色微妙。如諸菩薩。莊嚴身相。手中自然化五百億寶器。一一器中。天諸甘露。自然盈滿。左肩荷佩。無量瓔珞。右肩

復負無量樂器如雲住空從水而出讚嘆菩薩六

波羅密

半度跋提守宮神也由無量劫來久淨諸根於微妙六塵修勝功德今為彌勒造善

法堂所以此中種種六塵悉皆微妙言額上出珠者表一切諸塵皆從無上道實相中出也百億寶珠下至華上無量億光是色塵也其光明中至諸天聞者皆發無上道心是聲塵也時諸炬中至如寶華流是香塵也一華上至諸天甘露自然盈滿是味塵也左肩荷負無量瓔珞是觸塵也右肩復負至六波羅密是法塵也如是六塵此神久因彌勒慈心三昧所熏而成還是法供養菩薩此觀若成各從假入空觀所謂一空一切空破見思惑見真諦理得一切智證十信前七信大根清淨位也亦各相似位以實相理體相似乎顯尚為二惑所蔽故也

亦有七寶大師子座高四由旬閻浮檀金無量衆寶以爲莊嚴座四角頭生四蓮華一一蓮華百寶

所成一寶出百億光明其光微妙化爲五百億

衆寶雜華莊嚴寶帳時十方面百千梵王各各持

一梵天妙寶以爲寶鈴懸寶帳上時小梵王持天

衆寶以爲羅網彌覆帳上爾時百千無數天子天

女眷屬各持寶華以布座上是諸蓮華自然皆出

五百億寶女手執白拂侍立帳內持宮四角有四

寶柱一一寶柱有百千樓閣梵摩尼珠以爲交絡

時諸閣間有百千天女色妙無比手執樂器其樂

音中演說苦空無常無我諸波羅密如是天宮有

百億萬無量寶色一一諸女亦同寶色爾時十方

無量諸天命終皆願生兜率天宮。

此由宮神久入分證示居出假復爲彌勒造師子座也。前善法堂是菩薩利生之所不動而動由大慈悲所成表始覺之用也。今師子座是菩薩安坐之物動而不動由諸法空所成表本覺之體也。以始本不二所以堂之有座體能範圍一切所以座之有帳帳上有網果不離因故座一切所以座之有寶華外則剛以寶物內則柔以自衛故或懸之以寶鈴侍之以寶女若發之於博濟則爲四無量心所以豎之高四由句橫之四角有四蓮華若克以自廓則爲百界千如所以梵王天子天女數悉百千是皆此神無作妙力幻化所有也。此觀若成證入八九二信。

時兜率天宮有五大神第一大神名曰寶幢身雨七寶散宮牆內。一寶珠化成無量樂器懸處空中不鼓自鳴有無量音適衆生意。第二大神名曰

華德身雨衆華彌覆宮牆化成寶蓋。一一華蓋百千幢旛以爲導引。第三大神名曰香音身毛孔中出微妙海此岸旛檀香其香如雲作百寶色繞宮。七匝。第四大神名曰喜樂雨如意珠。一一寶珠自然住在幢旛之上顯說無量歸佛歸法歸僧及說五戒無量善法諸波羅密饒益勸助菩提音者。第五大神名曰正音聲身諸毛孔流出衆水。一一水上有五百億華。一一華上有二十五玉女。一一玉女身諸毛孔出一切音聲勝天魔后所有音樂。

此善法堂外復有五大神并前天子宮神皆是彌勒同行同願眷屬久證恐傳悉得如幻三昧。

故變現自在也前神由額出珠珠出供具此五  
神通身及毛孔 兩莊嚴具能上供菩薩下益  
衆生是乃超勝表從一實體中流出五分法身  
功德也此觀若成各從空入假觀十信滿心  
破塵沙惑見俗諦理得道種智證十信滿心  
名相似位也又圓教菩薩入於十信滿心便能  
破最初一分滅相無明而入初住八相成道故  
知第十信爲初住之因初住爲第十信之果  
謂破四十二品無明自第四十二信始也  
台宗破惑顯理之道以第四十二品配屬四十二  
位乃云破一品無明名爲初住算至妙  
覺尚餘一品而曲爲消釋不亦謬乎

○二結顯

此名兜率陀天十善報應勝妙福處乃至若有比  
丘及一切大衆不厭生死樂生天者愛敬無上菩  
提心者欲爲彌勒作弟子者當作是觀。一一思惟

兜率陀天上妙快樂。作是觀者名爲正觀。若他觀

者名爲邪觀。

行者務要所觀之境開目閉目了了

外道小乘所示各邪縱一切大乘修多羅說不  
合此經者亦名是邪若於定中忽見他方佛土  
勝兜率者此有二種一或行人往世曾修念佛  
三昧觀雖未成以宿根力暫爾示現但當  
專念彌勒菩薩大悲名號注觀兜率則諸佛慈  
力能助正觀必速成也一或往世曾修異道邪  
念種子正觀中今因正觀力逼邪種內發邪  
魔王波旬伺得其便故變佛國以惑行人當以  
空觀卻之卻法自念一切諸法惟心所現我心  
既空寂滅無主如一實相諸境從何起耶又况  
境不自境因心故境心不自心因境有心我今  
求心了不可得何有境耶如是念現輕者即滅  
則愈明勝當如前法治之若魔示現輕者即滅  
重者種種遷變不常或善或惡或喜或悲行者  
一心專念正觀及實相體徧禮諸佛勤行五悔  
誦法華經及上生經不久自然消殞不能爲害

又復今觀兜率顛見龍華等像尚非正觀亦須捨之况他法可愛着乎稍生愛染必入群邪壞正知見非法玉

○二觀正報

有聖凡二種一變

種可不慎諸三昧所熏示現也一分段身是界內凡夫業力所招報得身也今兜率一天具此二種內院悉是不退菩薩所居故諸天子天女身是變易外院純凡夫天身是分段彌勒亦示有二身生於波羅奈國劫波利村波婆利婆羅門家此示同分段身也釋尊說上生經後十二年二月十五日入滅卽於此天化生此示同變易身也行者應觀菩薩變易卽是法身况非報身耶既於前觀而得空假不二真俗雙融證十信滿心今當純用中道妙觀觀於彌勒正報入分段證位也

時兜率陀天七寶臺內摩尼殿上師子床座忽然化生於蓮華上結加趺坐身如閻浮檀金色長十六由旬三十二相八十種好皆悉具足頂上肉髻

髮紺瑠璃色釋迦毘楞伽摩尼百千萬億甄叔迦寶以嚴天冠有百萬億色一一色中有無量百千化佛諸化菩薩以爲侍者復有他方諸大菩薩作十八變隨意自在住天冠中彌勒肩間白毫相光流出衆光作百寶色三十二相一一相中五百億寶色一一好中亦有五百億寶色一一相好豔出八萬四千光明雲與諸天子各坐華座晝夜六時常說不退轉地法輪之行經一時中成就五百億天子令不退轉於阿耨多羅三藐三菩提如是處兜率陀天晝夜恒說此不退轉法輪度諸天子



此是彌勒菩薩自名字位後發菩提心來三祇百劫因位已極之最後身也故釋尊授一生記當得阿耨菩提自上升生此天當闍浮提五十六億萬歲爾乃下生有說釋迦滅後過八百八十萬九千三百年彌勒佛出世後是拘數未百二十萬九千三百年前出金口後是拘數未知孰當上生兜率為攝釋迦末法弟子下生闍浮為化三乘機熟衆生此亦順悉檀之權宜也况彌勒神通廣大妙用難思於未上升前念念間塵塵裡何時不成正覺何處不入相度生尚與三世諸佛同一法身前一究竟孰優孰劣孰後孰先此土緣當其後故乃求名之不若瞿曇惡他方機熟則釋迦之又若彌勒未可知也故知好遊俗姓之說先發後成之言不過抑揚其道為後世勸此猶幻人說夢話耳若據教乘定當等覺金剛乾慧又名金剛後心已歷重龜單覆十二將入妙覺果海也行者前觀依報已破枝末煩惱今觀正報方破空住異滅四十二品根本無明此觀若成名空假不二觀所謂一中一切中藏一品滅相煩惱始入分證初住

位見三德秘藏中一分一切種智以無明初破淨理初顯而於補處相好得見少分莊嚴已須聖流證不退地問華嚴八地尚須如來七勸圓教七住始得不退之名今初住何能便爾耶然退轉之言皆在信位非入任事也所以者何圓教行人自五品位便純用一心三觀觀不思議境而無心破惑其惑自破如刀劈竹迎刃即解直超等妙永無退事有等中人根器不定雖開圓理修即入漸及回心羅漢歷別修者先用奢摩他觀破見思惑自出生死後用三摩出假度生淨諸佛土但為俗境塵沙未得忍力如舍利弗多生退轉况今初住塵沙既盡已破無明見佛法身能於百界八相成道利樂有情聖後諸位如順風揚帆直達彼岸何退之有故華嚴七勸實簡別修七住之各不過業進之說今修上生觀者皆是不厭生死不求斷結大心衆生可同日而語哉問令觀依正經旨甚明何嘗論破感證位耶答三乘發轍專注破感上乘入觀志在見理此自然之道也求上生者雖本不斷結觀成其結自斷無心入位理顯位亦自成譬

如金純鑄自淨矣况乃迷有淺深則悟有前後故出家六即判位迥出家中三聖人復起不能易也既釋尊令先觀依報次觀正報此破惑入位之序如指諸掌何必見難問經中但令觀彌勒相答抑子之不解經意若是也經不云乎晝夜六時常說不退轉地法輪之行經一時中成就五百億天子令不退於阿耨菩提又云菩薩隨其宿緣爲說妙法令其堅固不退轉於無上道心此等雖在天宮之益作是觀者若開目閉目而究率依正不了了現前不特時聞不退法者未可輒謂觀成必須入定出定常見白毫散心靜心恒聞妙法所觀之境既微能觀之心洞然於如是不假命終便證法忍豈有卽此杯土尚異率天不假命終入住位也若能默會於言表裡自昭然不  
○三觀上生此令觀他人上生根見賢思齊圓觀易發也又二初觀他

佛滅度後我諸弟子若有精勤修諸功德威儀不缺掃塔塗地以衆名香妙華供養行諸三昧深入正受讀誦經典如是等人應當至心雖不斷結如得六通應當繫念念佛形像稱彌勒名如是等輩若一念頃受八戒齋修諸淨業發弘誓願命終之後譬如壯士屈伸臂項卽得往生兜率陀天於蓮華上結加趺坐百千天子作天妓樂持天曼陀羅華摩訶曼陀羅華以散其上讚言善哉善哉善男子汝於閻浮提廣修福業來生此處此處各兜率陀天今此天主名曰彌勒汝當歸依應聲卽禮禮

已諦觀眉間白毫相光卽得超越九十億劫生死之罪。是時菩薩隨其宿緣爲說妙法。令其堅固不退轉於無上道心。如是等衆生若淨諸業行六事法。必定無疑當得生於兜率天上。值遇彌勒亦隨彌勒下閻浮提。第一闍法於未來世。值遇賢劫一切諸佛。於星宿劫亦得值遇諸佛世尊。於諸佛前受菩提記。佛滅度後比丘比丘尼優婆塞優婆夷天龍夜叉乾闥婆阿修羅迦樓羅緊那羅摩睺羅伽等。是諸大衆若有得聞彌勒菩薩摩訶薩名者。聞已歡喜恭敬禮拜此人。命終如彈指頃卽得往

生如前無異。但得聞是彌勒名者。命終亦不墮黑暗處。邊地邪見諸惡律儀。恒生正見眷屬。成就不謗三寶。若善男子善女人。犯諸禁戒。造衆惡業。聞是菩薩大悲名字。五體投地。誠心懺悔。是諸惡業速得清淨。未來世中。諸衆生等。聞是菩薩大悲名。稱造立形像。香華衣服。繒蓋幢幡。禮拜繫念此人。命欲終時。彌勒菩薩放眉間白毫大人相光。與諸天子。兩曼陀羅華來迎此人。此人須臾卽得往生。值遇彌勒頭面禮敬。未舉頭頃。便得闍法。卽於無上道得不退轉。於未來世得值恒河沙等諸佛。如

來若有歸依彌勒菩薩當知是人於無上道得不  
 退轉彌勒菩薩成多陀阿伽度阿羅訶三藐三佛  
 陀時如此行人見佛光明即得受記若有欲生兜  
 率天者當作是觀此結觀於他人往生獲益蓋如此我豈不然大觀自繫念  
 思惟念兜率陀天持佛菩薩一日至七日思念十  
 善行十善道以此功德適向願生彌勒前者當作  
 是觀作是觀者若見一天人坐一蓮華此教行人於坐禪時修諸三昧行衆淨業當觀自身作一天人狀頭戴天冠身著瓔珞於兜率內院坐一蓮華久久自然觀成所以身居閻浮心在天上不論自他須圓三觀超入初住也

○四稱名獲益

若一念頃稱彌勒名此人除卻千二百劫生死之  
 罪但聞彌勒名合掌恭敬此人除却五十劫生死  
 之罪若有禮敬彌勒者除却百億劫生死之罪設  
 不生天未來世中龍華菩提樹下亦得值遇發無  
 上道心作是觀者名為正觀若他觀者名為邪觀

得遇龍華修證懺儀卷第三終

比丘通能  
 自行行迹  
 入淵覺

雲神庵丘直勝  
 此性淨  
 如元

如源  
 如理  
 為時

信士張文輝  
 張文輝張文輝  
 張思齊張思齊

得遇龍華修證懺儀卷第四

天台山慈雲寺傳教觀沙門如惺撰

第十一別觀龍華

前觀兜率是因今觀龍華是果以三世諸佛將成正覺必先處兜率陀天接引調伏先佛法中善根成熟衆生使入不退然後下生授與一乘之記此千古不易之道也豈非前觀爲龍華之化城乎若願生他方佛刹宿與龍華有緣因彌勒成道觀光而來華林法會經說第二會有他方諸天及八部衆六十四憶恒河沙人發菩提心住不退轉者是

龍華僧傳 卷之七  
也。則知初會得度者皆是不厭生死不艷淨土不求斷結衆生。何以故。祇如釋迦彌勒同一道也。王舍雞頭同一地也。此時彼世同一界也。短命長齡同吾人也。豈非心垢土垢。心淨土淨。是知垢淨在心不在國土也。故當內觀實相達諸法空。便使玲蹠辛苦亦饒四藏之珍。外溥仁慈等心濟物。縱處巖嶮之巖。卽踐如掌之地。故毘舍浮佛告持地菩薩言。當平心地則世界地一切皆平。今衆生以濁心觀娑婆界。此界自然穢惡充滿。如目有眚燈現五色毛輪。楞嚴云。汝以色空相傾相奪於如來藏。

而如來藏隨爲色空周徧法界。我以妙明不滅不生合如來藏。而如來藏惟妙覺明圓照法界。法華云。見此娑婆世界其地琉璃坦然平正。閻浮檀金以界八道。寶樹行列。諸臺樓觀皆悉寶成。其菩薩衆咸處其中。以是觀之。則彼雞頭之淨特吾心之淨耳。知是而觀。龍華華易若菴摩勒果也。

○分二。初辯異。二正觀。所言異者。諸經所載彌勒成佛之跡。頗有異處。何以故。釋尊說非一時。住非一處。經至此方來非一時。譯非一人。是故難爲准的。今略以四科辯之餘可知矣。一。身量。二。壽量。三。

音華憫備 卷之四  
樹量四初會。先辯身量之異。○彌勒下生經姚秦鳩摩羅什譯。說彌勒身長千尺。胸廣三十丈。面長十二丈。○彌勒來時經東晉時譯。失人名。說身長十六丈。○觀彌勒下生經西晉竺法護譯。不說身量。○彌勒成佛經亦羅什譯。說身長釋迦牟尼八十肘。三十一丈胸廣二十五肘。十丈面長十二肘半。五丈○彌勒下生成佛經唐武周義淨三藏譯。亦說身長八十肘。肩二十肘。面廣肩半量。○又成佛經說彼時衆生壽命具足八萬四千歲。無有中夭。人身悉長十六丈。若論賢劫千佛。其九百九十九尊皆出

減劫。獨樓至一佛出於增劫。悉在住劫中二十小劫也。第九小劫自八萬四千歲始。每過百年減一歲。人身短一寸。至二萬歲時。迦葉佛出。迦葉佛滅後。又百年一減。減至人壽百歲。身長一丈。時釋迦出世。釋迦滅後。減至人壽十歲。身長一尺。止。此後百年一增。增至八萬四千歲。足是爲第十小劫。又仍前減。至八萬歲時。彌勒出現世間。若准釋迦出於周時。身當一丈。故文王身長九尺餘。佛身倍人。乃長一丈六尺。又依十歲一尺之數推算。彼時人民尚應身長八百丈。况佛身止於千尺。及八十肘耶。疑此尺字。本無魚魯之訛也。佛必倍人。恐應千丈。

音華懺儀 卷一  
非千尺也。如釋迦化身丈六是矣。又二地菩薩尚見千丈佛身。若地地增勝。則身量難思。况彌勒出時人壽。既云具足八萬四千歲。獨佛身如是之卑小乎。又言人身悉長十六丈。此當千六百歲時之數。似亦未遑。此或釋尊欲逗當時聽法之機。故作是異說。不然。譯師之誤也。問。丈六千尺。皆三乘共見。舍那報身。獨菩薩法。可同年哉。答。誠然。二乘不見尊特。大乘報化不二。今借此勝。應明彼劣。應是或非。或何者。如淨華宿王智佛。身長六百八十萬由旬。妙音止長四萬二千由旬。少佛六百七十萬五萬八千由旬。豈

便指報身耶。妙音身量不過類彼國人。佛既超勝。况彌勒不能舒之千丈。以應八萬歲時衆生乎。

○次辯壽量之異。下生經說。彌勒佛住世六萬歲。下生成佛。偈云。期於六萬歲。說法度衆生。觀下生經說。佛壽八萬四千歲。成佛經說。彌勒佛住世六萬億歲。正法像法亦各六萬歲。然彌勒下生及彌勒成佛二經。皆出什師所譯。一云六萬歲。一云六萬億歲。豈自不檢點矛盾。一至於此耶。此非筆授者之誤。必傳書者之謬也。如釋迦壽應百歲。自減二十。故八十唱滅。推彌勒應八萬歲。當減二萬



故云六萬理或當也。詎有國人入萬之壽而佛獨高邁六萬億哉。其謬不辯可知矣。

○次辯樹量之異。彌勒下生經說龍華樹高五十里。觀下生經說高一由旬廣五百步。來時經說高四十里。由旬一廣亦四十里。成佛經說高五十由旬。二千下生成佛經說高四踰繕那。即四由旬一陰百六十里也六拘盧舍。下生與成佛二經係什師一人之譯。一云五十里。一云五十由旬。二說之不侔。又如此。若佛身准滅劫八萬歲時。應長千丈餘。菩提樹奚止五十里。及一由旬。准於四踰繕那方稱身量。言五

由旬樹恐太高

○次辯初會異。略有二種。一說法處異。二見迦葉異。下生經來時。經等俱說彌勒成道已在龍華樹下。說三會法。獨成佛經說彌勒成三菩提。已首度。偃佉王。與無數天龍八部。入翅頭末城。說四諦。十二緣度。人天衆名爲初會。時彌勒佛眷屬圍繞出城。還華林園。說二會法。此其一也。又觀下生經說彌勒成道已。首度魔王。大將次善財長者。次偃佉王等。將無數千人。往山中見大迦葉。此名第一會。下生經說在華林園。說三會法。度人天已入城乞

龍華備錄 卷之四  
食降大力魔方至耆闍山頂見大迦葉不說初會見與成佛經所說同如是種種異說行人何所從以成觀境况羅什素稱七佛譯師尚自相左若是他之不倖固可知矣雖然悉是金口難可是非欲令行者標心故伸辯如右今觀竺法護譯名觀彌勒菩薩下生經對前高昌郡譯亦有觀字正是行人用觀之處似可依憑又况文約義備初心易成若觀心純熟又當進於什師所譯彌勒成佛經廓其心量故兩存之也

嚴  
嚴京

○第二正觀有三。初觀同居。二觀劣應。三結勸。同若又二。初略示城郭。二徧觀閻浮。

彌勒如來出現世時正值增極減初之際故國界之勝妙。身壽之修長。一如諸佛淨土。尤當以四土分之。始盡厥德。否則理事既淆。體用亦濫。觀心何從。實相靡顯。所以迷由理始。悟必事先。誠曰頓修不妨漸詣。所言四土者。一曰凡聖同居土。此人天七趣及藏教聲聞所居。所見佛身。卽八相成道之化身也。亦云生身。但三十二相八十隨好。經或云千尺。或云十六丈。或云八十肘是也。所居雖或垢淨。同此大千。同此日月。不然。彼時何故尚有三病。

一者飲食二者便利三者衰老二曰方便有餘土。純是通教二乘

及菩薩所居。所見生身尊特合身佛。證但空二乘

見生身。證不空菩薩見尊特。佛身既二土豈一耶

應前緣同居後緣實報三曰實報莊嚴土。是別圓菩薩所居

非二乘能見。所見惟尊特身。身有無量色。色有無

量相。相有無量好。所住依報亦有無量種種莊嚴

隨所示現。即無有邊不可窮盡。如華嚴說佛相好

一一有十華藏世界微塵數。四曰常寂光土。惟是

十方三世如來究竟果位清淨法身所居。形等太

虛。體即法界。惟佛究盡非菩薩法。圓教等覺猶未

了了。况地前者乎。如是分屬不但顯聖人有應物

現形之用。抑開行者有造修之門。故知雞頭華林

雖云淨勝。比今五濁。不過福優根利耳。是宜同居

○初略示城郭。彌勒菩薩下生經云。於此國界

當有城郭。名曰雞頭。東西十二由旬。南北七由旬

彌勒成佛經云。有一大城。名翅頭。木縱廣一千二百由旬。高七由旬。土地豐熟。人民

熾盛。街巷成行。自然化生。七寶樓閣。端嚴殊妙。莊校清淨。於慈闡開。列諸寶女。手中

皆執真珠羅網。雜寶莊校。以覆其上。密懸寶鈴。聲如天樂。七寶行樹。樹間清泉。皆七寶成流。異色水

更相映發。交橫徐遊。不相妨碍。其兩岸邊。純布金沙。街巷道陌。廣十二里。皆悉清淨。猶如天園。眾寶

莊嚴。爾時城中有龍王。名曰水光。夜雨香澤。晝則清

涼。時城中有龍王。名曰水光。夜雨香澤。晝則清

和有大龍王名多羅尸棄福德威力皆悉具足其地近城龍王宮殿如七寶樓顯現於外常於夜半化作人像以吉祥餅盛香色水灑淹塵土其地潤澤譬若油塗行人往來無有塵土是時世人福德所致巷陌處處有明珠柱高十二里光踰於日四方各照八十由旬純黃金色其光照耀晝夜無異燈燭之明猶如聚墨香風時來吹明珠柱雨寶纓絡衆人皆用服者自然如三禪樂處處皆有金銀珍寶摩尼珠聚積用成山放光普照是時雞頭城內人民遇者皆悉歡喜發菩提心

城中有羅刹鬼名曰葉華所行順法不違正教每伺人民寢寐之後除去穢惡諸不淨者又以香汁而灑其地極爲香潔有大夜之神名跋陀婆羅除諸人民掃灑清淨

○二徧觀閻浮又三初世界一人民三國王今初

當爾之時閻浮提地東西南北十萬由旬

諸山河石壁皆自消滅四大海水各據一方時閻

浮地極爲平整如鏡清明四大海水各減二千由旬時閻浮提地縱廣

正等十千由旬其地地平淨如甍嶠鏡舉閻浮地內穀食豐賤人民熾

盛多諸珍寶諸村聚落雞鳴相接是弊花果樹枯

竭穢惡亦自消滅其餘其美果樹香氣殊好者皆

生於地大適意華悅可意華極大音華優曇鉢華大金果華七寶果華白銀果華華鬚柔軟

狀如天繡生吉祥果香味具足軟如天繡叢林樹

華其果美好極大茂盛過於帝釋歡喜之園其樹

高顯高三十里城邑次比雞飛相及

○次觀人民

信士楊愷助刻

爾時時氣和適四時順節人身之中無有百八之患貪欲瞋恚愚癡不大殷勤人心均平皆同一意相見歡悅善言相向言辭一類無有差別如彼鬱單越人而無有異是時閻浮地內人民大小皆同一響無有若干差別異也彼時男女之類意欲大小便時地自然開事訖之後地復還合爾時閻浮地自然生粳米亦無皮裹極爲香美食無患苦所謂金銀珍寶礪礪碼礪真珠琥珀各散在地無人省錄是時人民手執此寶自相謂言昔者之人由此寶故更相傷害繫閉在獄受無數苦惱如今此

寶與瓦石同流無人守護時閻浮地內自然樹上

生衣極細柔軟人取着之如今鬱單越人自然樹

上生衣而無有異皆由今佛種大善根行慈心報

欲樂安隱亦無寒熱風火等疾無九惱苦壽命具足八萬四千歲無有中夭人身悉長十六丈日日

受文極妙安樂遊深禪定以爲樂器唯有三病一

者飲食二者便利三者衰老女人年五百歲爾乃

行欲設有便利地裂受之愛已還合生亦蓮華以

覆穢氣時世人民若年衰老自然行詣山林樹下

安樂擔怕念佛取盡命終多生大梵天上及諸佛

前其土安隱無有怨賊劫竊之患城邑聚落無閉

門其土安隱無有怨賊劫竊之患城邑聚落無閉

常慈心恭敬和順調伏諸根如子愛父戒不啖肉

語言謙遜皆由彌勒慈心訓導持不殺戒不啖肉

故以此因緣生彼國者諸根淡靜面貌端正威相

具足如天童子復有八萬四千衆寶小城以爲眷

屬翅頭末城最處其中男女大小雖遠若近佛神

音華備錄 卷之四  
力故兩得相見無有障礙夜光摩尼如意珠華徧滿世界乃至爾時闍浮提中常有好香譬如香山流水美好味并除患雨澤隨時天園成熟香美稻種天神力故一種七種用功甚少所收甚多穀稼滋茂無有草穢衆生福德本事果報入口消化百味具足香美無比氣力克實。

○三觀國王

爾時法王出現名曰儂佉正法治化七寶成就所謂七寶者金輪寶象寶馬寶珠寶寶玉女寶典兵寶守藏寶是謂七寶鎮此閻浮地內不以刀杖自然靡伏四珍之藏第一乾陀越國伊羅鉢寶藏多諸珍寶異物不可稱計第二彌提羅國般綢大藏亦多珍寶第三須賴吒大國有大寶藏亦多珍寶

第四波羅捺國儂佉大寶藏亦多諸珍寶不可稱計此四大藏自然應現諸守藏人各來白王唯願大王以此寶藏之物惠施貧窮爾時儂佉大王得此寶已亦復不省錄之竟無財物之想

其國爾時有轉輪聖

王名曰儂佉有四種兵不以威武治四天下具二十有七大人相好王有千子勇猛端正怨敵自伏王有七寶一金輪寶千輻轆轤皆悉具足二曰象寶白如雪山七支拄地嚴顯可觀猶如足王三曰馬寶朱鬣毛尾足下生華七寶蹄甲四神珠寶明顯可觀長於三肘光明雨寶適衆生願五女寶顏色美妙柔軟無骨六主藏臣口中吐寶足下雨寶手中出寶七主兵臣直動身視四兵如雲從空而出千子七寶國界人民一切相視不懷惡意如母愛子有四大寶藏一各有四億小藏圍繞此四大藏自然開發顯大光明縱廣正等一千由旬滿中珍寶有四大龍各自守護此四大藏及諸小藏自

然湧出形如蓮華無央數人皆共往觀是時衆意無守護者衆人見之心不食着棄之於地猶如瓦石草木土塊時人見者心生厭離各各相謂而作是言如佛所說往昔衆生爲此實故共相殘害更相偷劫欺誑妄語令生死罪長轉增長墮大地獄

○二觀劣應身有八種相一降兜率二托胎三住胎四出胎五出家六降魔成道共合爲一七轉法輪八入涅槃此名大乘八相成道若小乘經說無住胎合在托胎共爲一種又大乘人見如來相相互具各各有八小乘人見相支離始終唯八此中又二先觀父母

爾時彼王有大臣名曰修梵摩是王少小同好王

甚愛敬又且顏貌端正不長不短不肥不瘦不白不黑不老不少是時修梵摩有妻名梵摩越玉女中最極殊妙如天帝妃口作優鉢羅華香身作梅檀香諸婦人八十四態永無復有亦無疾病亂想之念

○次正觀佛身第一降兜率

爾時彌勒菩薩於兜率天觀察父母不老不少

便降神下應

時城中有大婆羅門王名修梵摩婆羅門女名梵摩跋提心性柔弱彌勒

托生以爲父母雖處胞胎如遊天宮放大光明塵垢不障

○護譯缺托胎住胎二種今什譯足之第四出胎

從右脇生。如我今日右脅生無異。彌勒菩薩亦復如是。兜率諸天各各唱令彌勒菩薩已降神生。是時修梵摩卽與子立字名曰彌勒。彌勒菩薩有三十二相八十種好莊嚴其身。身黃金色。身紫金色。具三十二大丈夫相。坐寶蓮華。衆生見之無有厭足。光明晃耀。不可勝計。諸天人。世人。所未曾視。身力無量。一一節力。皆勝一切。大力龍象。不可思議。毛孔光。明。照耀。無量。無有障礙。日月星宿。水火珠光。皆悉不現。猶如埃塵。身長。釋迦佛八十肘。胸廣二十五肘。面長十二肘。半鼻高。修直。當於兩門。身相具足。端正無比。成就相好。一一相入萬四千好。以自莊嚴。如鑄金像。一一好中。流出光明。照于由旬。肉眼。清徹。青白分明。常光。繞身。而百由旬。日月星辰。眞珠摩尼。七寶行樹。皆悉明耀。現於佛光。其餘衆光。不復爲用。佛身高顯。如黃金山。見者自然脫三惡趣。

○第五出家

爾時彌勒在家未經幾時便當出家學道。

爾時彌勒諦觀

世間五欲過患。衆生受苦。沉沒長流。在大生死。甚可憐愍。自以如是正念。觀祭苦空。無常。不樂在家。厭家。迫近。猶如獄。時懷伏王。共諸大臣。國土人民。持七寶臺。有千寶帳。及千寶軒。千億寶鈴。千億寶旛。寶羅千口寶甕。千口奉。上彌勒受已。施諸婆羅門。婆羅門受已。卽便毀壞。各共分之。諸寶羅門。觀彌勒能作大施。生奇特心。彌勒菩薩見此。寶臺須臾無常。知有爲法。皆悉磨滅。修無常想。讚過去佛。清涼甘露。無常之偈。諸行無常。是生滅法。生滅滅已。寂滅爲樂。

○第六成道

爾時去雞頭城不遠有道樹名曰龍華。高一由旬。廣五百步。時彌勒菩薩坐彼樹下。成無上道果。當



其夜半彌勒出家即其夜分成無上道應時三千大千刹土六反震動地神各各而相告曰彌勒已成佛道其聲轉至聞四天王宮彌勒已成佛道轉聞徹於三十三天談摩天兜率陀天此外院諸天開不退法者俱隨彌勒下生外院雖與彌勒同居此天但聞其名不見身相亦不問法况知菩薩降神處胎等相耶故今成道賴下天報聞乃知也化樂天他化自在天乃至梵天坐於金剛莊嚴道場龍華菩提樹下枝如寶龍吐百寶華一一華葉作七寶色色色異果適衆生意天上人間為無有比樹高五十由旬枝葉四布放大光明爾時彌勒與人萬四千婆羅門俱詣道場彌勒即自剃髮出家學道早起出家即於是日初夜降四種魔成阿耨多羅三藐三菩提印說偈曰久念衆生苦欲拔無由脫本者証菩提豁然無所有亦連衆生空本性相如實永更無愛

苦慈悲亦無緣本為救汝等國城及頭目妻子與手足施人無有數今始得解脫無上大寂滅當為汝等說廣開甘露道如是大果報皆從施戒慧六種大忍生亦從大慈悲無染功德得說此偈已默然而住時諸天龍鬼神王不現其身而雨天華供養於佛三千大千世界六變震動佛出前照無量國應可度者皆得見佛

○第七轉法輪此是龍華樹下說三乘法三會度人者也

彌勒成道已爾時魔王名曰大將以法治化聞如來名音響之聲歡喜踊躍不能自勝七日七夜不眠不寐是時魔王將欲界無數人天至彌勒佛所恭敬禮拜彌勒尊聖與諸人天漸漸說法微妙

之論所謂論者施論戒論生天之論

此說人天欲界法五戒十

善欲不淨想出要為妙

時彌勒見諸人民已發心歡喜諸佛世尊常所說

法苦集盡道與諸天人廣分別其義

爾時座上八萬四千天子諸塵垢盡得法眼淨

人民之類曰汝等速出家所以然者彌勒今日已

度彼岸亦當度汝等便至彼唵爾時雞頭城中有

一長者名曰善財聞魔王教令文聞佛音響將八

萬四千衆至彌勒佛所頭面禮足在一面坐爾時

彌勒漸為說法微妙之論所謂論者施論戒論

爾時彌勒見諸人民心開意解如諸佛世尊常所

說法苦集盡道為諸大人廣分別其義爾時座上

八萬四千人諸塵垢盡得法眼淨是時善財與八

萬四千人等即前白佛求索出家善修梵行盡成

羅漢道果爾時彌勒初會八萬四千人得阿羅漢

是時優佉王聞彌勒已成佛道便往至佛所欲得

聞法時彌勒佛與王說法初善中善後善義理深

邃爾時大王復於異時立太子為王賜剃頭師珍

寶復以雜寶與諸梵志將八萬四千衆往至佛所

龍華懺儀 卷四  
求作沙門。盡成道果。得阿羅漢。是時修梵摩大長者聞彌勒已成佛道。將八萬四千梵志之衆。往至佛所。求作沙門。得阿羅漢示。唯修梵摩一人。斷三結。使必盡苦際。是時佛母梵摩越。復將八萬四千姪女之衆。往至佛所。求作沙門。爾時諸女。盡得羅漢。唯有梵摩越一人。斷三結。使成須陀洹。爾時諸刹利婦。聞彌勒如來出現世間。成等正覺。數千萬衆。往至佛所。頭面禮足。在一面坐。各各生心。求作沙門。出家學道。或有越次取證。或有不取證者。其不越次取證者。盡是奉法之人。厭患一切世間不

可樂想。爾時彌勒當說三乘教。如我今也。云云。

爾時

釋提桓因護世天王。大梵天王。無數天子。於華林園。頭面禮足。合掌勸請。轉於法輪。時彌勒佛默然受請。告梵王言。我於長夜。受大苦惱。修行六度。始於今日。法海滿足。建法幢。擊法鼓。吹法螺。雨法雨。正爾當爲汝等說法。諸佛所轉。入聖道。輪諸天世人。無能轉者。其義平等。直至無上。無爲寂滅。爲衆生斷長夜苦。此法甚深。難得難入。難信難解。一切世間。無能知者。無能見者。洗除心垢。得萬梵行。說是語時。復有他方無數百千萬億天子。女大梵天王。乘天宮殿。持天花香。奉獻如來。繞百千匝。五體投地。合掌勸請。云云。時儀仗王。高聲唱言。設復生天。樂會亦歸磨滅。不久墮地獄。猶如猛火聚。我等宜時速出家學佛道。說是語已。與八萬四千大臣。恭敬圍繞。及四天王。送轉輪王。至華林園。龍華樹下。諸彌勒佛。求索出家。門時。彌勒佛。共儀仗王。髮自落。袈裟着體。便成沙門。時彌勒佛。共儀仗王。與八萬四千大臣比丘僧等。恭敬圍繞。併與無數天龍八部。入超頭末城。足躡門闌。婆娑世界。六種

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

龍華懺儀 卷之四

震動閻浮提地化為金色翹頭末大城中央其地  
金剛有過去諸佛所坐金剛寶座自然湧出眾寶  
行樹天於空中雨天寶花龍王作眾妓樂口中吐  
華毛孔雨華用供養佛佛於此座轉正法輪謂是  
苦菩提論謂是集集聖諦謂是道道聖諦并為演  
說三十七品助菩提法亦為宣說十二因緣無明  
緣行緣識識緣名色名緣六入六入緣觸觸  
緣受受緣愛愛緣取取緣有有緣生緣老死憂  
悲苦惱等爾時大地六種震動如此梵聲聞於三  
千大千世界復過是數無量無邊下至阿鼻地獄  
上至阿迦賦吒天云云爾時彌勒佛以大慈心語  
諸大眾言汝等今者不以生天樂故亦復不為今  
世樂故來至我所但為涅槃樂因緣是諸人等  
皆於佛法中種諸善根禪迦牟尼佛出五濁惡世  
種種詞責為汝說法無奈汝何教植來因令得見  
我我今攝受五濁惡世教化如是等百千萬億諸  
惡善哉能於五濁惡世教化如是等百千萬億諸  
惡眾生令修善本來生我所時彌勒佛如是三稱  
讚釋迦牟尼佛而說偈言忍辱勇猛大導師能於  
五濁不善世教化成熟惡眾生令彼修行得見佛

荷負眾生受大苦令入常樂無為處教彼弟子來  
我所我今為汝說四諦亦說三十七菩提莊嚴涅  
槃十二緣汝等宜當觀無為入於空寂本無處復  
更讚嘆彼時眾生於苦惱惡世能為難事貪欲瞋  
恚愚癡迷惑短命人中能修持戒作諸功德甚為  
希有爾時眾生不識父母沙門婆羅門不知道家  
互相惱害近刀兵劫淫著五欲嫉妬誦曲佞獨邪  
偽無憐愍心更相殺害食肉飲血不敬師長不識  
善友不知思報恩生五濁世不知慙愧晝夜六時  
相續作惡不知厭足純造不善五逆惡聚魚鱗相  
咀求不知厭尤親諸族不能相濟善哉善哉釋迦  
牟尼佛不知厭尤親諸族不能相濟善哉善哉釋迦  
和顏美色善巧智慧說誠實語示我當來度脫汝  
等如是導師明利智慧世間希有甚為難遇深心  
憐愍惡事眾生為拔苦惱令得安樂入第一義甚  
深法性釋迦牟尼佛三阿僧祇劫為汝等故修行  
難行苦行以頭布施割截耳鼻手足體受諸苦  
惱為入正道平等解脫利汝等故時彌勒佛如是  
開導安慰無量諸眾生等令其歡喜彼時眾身  
絕是法心純是法口常說法福德智慧之人充滿

龍華懺儀

卷之四

七

其中夫人恭敬信受渴仰時大導師各欲令彼聞於往昔苦惱之事復作是念五欲不淨衆苦之本又能除捨憂感愁恨知苦樂法皆是無常爲說色受想行識苦空無常無我說是語時九十六億人不受諸法漏盡意解得阿羅漢三明六通具入解脫三十六萬天子二十萬天女發阿耨多羅三藐三菩提心天龍八部中有得須陀洹者種辟支佛道因緣者發無上道心者數甚衆多不可稱計○二師所譯初會不同護譯三會俱在樹下又彌什譯初會入城中說今並存之賢者自考又彌勒如來將無數千人前後圍繞往至此山中遂蒙佛恩諸鬼神當與開門使得見迦葉禪窟是時彌勒伸右手指示迦葉告諸人民過去久遠釋迦文佛弟子名曰迦葉今日現在頭陀苦行最爲第一是時諸人見是事歎未曾有無數百千衆生諸塵

垢盡得法眼淨或有衆生見迦葉身已此名爲最初之會九十六億人皆得阿羅漢斯等之人皆是我弟子所以然者悉由受我教訓之所致也亦由四事因緣惠施仁愛利人等利爾時彌勒如來當取迦葉僧伽梨着之是時迦葉身體奄然星散是時彌勒復取種種華香供養迦葉所以然者諸佛世尊有敬心於正法故彌勒亦由我所受正法化得無上正眞之道當知彌勒佛第二會時有九十四億人皆得阿羅漢亦復是我遺教弟子行四事供養之所致也又彌勒第三會九十二億人得阿羅

漢亦復是我遺教弟子。爾時比丘姓號皆曰慈氏弟子。如我今日諸聲聞皆稱釋迦弟子。爾時彌勒為諸弟子說法。汝等比丘當思惟無常之想。樂有苦想。計我無我想。實有空想。色變之想。青瘀之想。胖脹之想。食不消想。膿血想。一切世間不可樂想。所以然者。比丘當知此十想者。皆是過去釋迦文佛為汝眾等說。令得盡有漏心得解脫。云云。時彌勒與九十六億大比丘眾并懷佐王。八萬四千大臣。比丘眷屬圍繞。如月天子諸星隨從。步出翅頭末城。還華林園重閣講堂。時閻浮提城邑聚落小國王長者及諸四姓皆悉來集。龍華樹下華林園中。爾時世尊重說四諦十二因緣九十四億人得阿羅漢。他方諸天及八部發三菩提心。云云。

○此龍華三會說法度之像止此護。爾時彼眾中譯直觀龍華不說入城蓋略之也。諸天人思惟此十想。十一垓人諸塵垢盡得法眼淨。彌勒如來千歲之中。眾僧無有瑕穢。爾時恒以一偈已為禁戒。口意不行惡。身亦無所犯。當除此三行。速脫生死。關過千歲後。當有犯戒。遂復立戒。爾時說法之處。廣八十由旬。長百由旬。其中人眾若坐若立。若近若遠。各目見佛在於其前。獨為說法。

○第八入般涅槃。什譯八相甚詳。避繁不錄。學者請自檢之。

彌勒如來當壽八萬四千歲。般涅槃後遺法當

存八萬四千歲所以然者爾時衆生皆是利根

住世六萬億歲憐愍衆生故令得法眼滅度之後諸天人聞維佛身時轉輪王收取舍利於四天下各起八萬四千塔正法住世六萬歲像法亦六萬歲○正觀文竟

○結勸勤修

其有善男子善女人欲得見彌勒佛及三會聲聞

衆及雞頭城見僊佉王并四大藏珍寶者欲食自

然粳米者并着自然衣裳身壞命終生天上者

兜率天宮非餘天也彼善男子善女人當勤加精進無得懈

怠亦當供養承事諸法師名華擣香種種供養無

令有失當作是學

汝等宜應勤精進發清淨心起諸善業得見世間燈明彌勒佛

身必無疑也云云佛告阿難汝好憶持普為天人

分別演說莫作最後斷法之人此法之要各一切

衆生斷五逆罪淨除業障報障煩惱障修習慈心

與彌勒共行亦各一切衆生得聞彌勒佛名必免

五濁世墮惡道經亦各破惡口業心如蓮華定見

彌勒佛經亦各慈心不殺不食肉經亦各者決定

迦牟尼佛以衣為信經亦各有聞佛名者決定

得免入難經亦各彌勒成佛經佛告舍利弗我滅

度比丘比丘尼優婆塞優婆夷天龍八部鬼神等

得聞此經受持讀誦禮拜供養恭敬法師破一切

業障報障煩惱障得見彌勒及賢劫千佛三種善

提隨願成就不受女人身正見出家得大解脫

○已上所錄二經既本三譯文自難齊如護譯先

城郭後始闢浮什譯先闢浮後說城郭據理什譯

誠富但護譯文約事簡足副初機故三會後不說

辭其文是今立科一依其意況志在前閱易觀鳥敢

文在後提之於前此亦斷章取義之道也又或文

有不關於觀行者去之有繁而不便錄者乃書云

云二字槩之不過欲行人之成觀而已覽者諒恕

之也若欲盡其文意開彼全經義必自暢又復應  
 知正觀文中雖分同居劣應二科一須用圓三觀  
 觀其若依若正一唯心事事實相如是進功自  
 然頓見不思議諦理也若見是理觀於雜頭道樹  
 便是華嚴莊嚴勝身劣身總即遮那法體一土如  
 是諸塵亦然一佛既然眾生悉爾是以普賢一毫  
 具合法界華嚴一說十世無窮如是見者方知吾  
 心之彌勒念念道成卽性之龍華時時香噴風動  
 塵起依彌鳥啼無非三會之音又何  
 俟五十六億萬歲而後始見慈氏耶

第十二念一實相

實相者卽法華所謂佛知見也諸佛出世本令眾  
 生開示悟入稱爲一大事因緣天台大師教觀本  
 具十如制曰不思議境此一法而異名也眾生迷  
 諸佛知見爲楞嚴心目菩薩悟衆生心目卽法華

知見此一體而異相也然則名有千殊法無二致  
 相雖萬別體自一真故觀不照體總曰邪因行或  
 離心終成有漏所以摩訶止觀專令行者務於十  
 法成乘觀於現前一念妄心卽空卽假卽中三千  
 具足此爲五十五位菩提之究竟三乘十二分教  
 之指歸者矣若修前十一門而不造極乎此者可  
 謂尋流而忘源捨本而務末也若圓教行人正信  
 中便知心佛衆生三無差別一色一香無非中道故  
 一一門皆依不思議起境何俟至此方念實相者耶  
 然前十一門雖依妙境而起尚涉事修惟此一門



音聲字楷傳 卷之四  
十  
專屬理觀故以一行三昧直觀第一義諦毫不托  
彼觀心所以寧缺前前莫虧後後事懺縱密獨被  
初機雖破惑纏但盡四住理觀直通等覺窮極無  
明邊際故謂彈指超無學日劫相倍者誠在是矣  
如是之觀名曰正觀

○分二初觀正體二顯妙用初正體

法華懺儀云何名正觀如菩薩法不斷結使不住  
使海觀一切法空如實相是名正觀云何名觀一  
切法空行者當諦觀現在一念妄心隨所緣境如  
此之心爲因心故心爲不因心故心爲亦因心亦

不因心故心爲非因心非不因心故心爲在三世  
爲在內外兩中間有何足跡在何方所如是等種  
種因緣中求心畢竟不可得心如夢幻不實寂然  
如虛空無名無相不可分別爾時行者尚不見心  
是生死豈見心是涅槃旣不得所觀亦不存能觀  
不取不捨不倚不着一切念想不起心常寂然亦  
不住寂然言語道斷不可宣說雖不得心非心相  
而了了通達一切心非心法一切皆如幻化是名  
觀心無心法不住法諸法解脫滅諦寂靜作是懺  
悔名大懺悔名莊嚴懺悔名無相懺悔心如流水

前華嚴經 卷四  
不住法中。所以者何。一切妄想顛倒所作罪福諸法皆從心起。離心之外。則無罪福。及一切法。若觀心無心。則罪福無王。知罪福性空。則一切諸法皆空。如是觀時。能破一切生死顛倒。三毒妄想。極重惡業。亦無所破。身心清淨。念念之中。照了諸法。不受不着。微細陰界。以是因緣。得與三昧相應。三昧力故。卽見普賢及十方佛摩頂說法。一切法門悉現一念心中。非一非異。無有障礙。譬如如意寶珠。具足一切珍寶。如是實性。非內非外。行者善觀。心性猶如虛空。於畢竟淨心中。見一切法門。通達無

闕亦復如是。是名行者觀心實相懺悔六根。不斷五欲得淨諸根。見障外事。

○二顯妙用

夫法無得失。垢淨惟心。心淨則樹實七珍。心垢則土堅五濁。是故十界依正。總若捏目之空花。五陰妄緣。何異寐人之夢境。所以佛祖垂言教觀。現前習起剎那生滅。妄心本具一切善惡諸法。因緣感故。陟降隨焉。達性體空。昇沉一際。故行人應觀現今三障。卽是諸佛清淨三德。所以者何。以法非實。故性不二。故衆生無明覆心德。乃成障。聖人智慧朗

然障卽是德故諸佛菩提三智涅槃四德本於衆  
生煩惱業苦中求捨九界修惡別無佛界之性善  
也亦非翻破彼九性惡成佛界善又非壞九惡相  
成法身體何以故譬富長者其子心狂聚僕爲寇  
劫自家寶長者有智但治其心疾賊不須破狂妄  
旣瘳而天性之親自在所有營伍衣械原是家具  
非外寇物須毀壞之如水具波波卽是水似金成  
器器不離金故知衆生七趣之昇沉便是如來無  
作之妙用十纏九結豈非究竟三解脱門是故當  
觀我此陰心豈非法華惟佛與佛究竟盡諸法實相

觀實相者雖處斯世不見有穢惡之可捨居龍華  
亦不見有淨妙之可取欣厭之情旣空而垢淨之  
心盪矣然後十方國土如意往生十二類衆隨緣  
度脫或說佛界是衆生界衆生界是佛界非抑揚  
也或說衆生界卽佛界非增也佛界卽衆生界非  
損減也或說一佛有無量身一一身放無量光明  
雲一一光明雲現無量世界海一一世界海有無  
量葉華幢一一葉華幢莊嚴無量寶獅子座一一  
座上各有菩薩成無上道卽從自身現無量眷屬  
圍繞轉微塵數三乘十二行法輪度無邊衆生海

音五僧論 卷四  
各各令其成就無量無邊諸三昧門諸神通門諸  
解脫門於世出世法不增不減或說一身有無量  
塵一一塵有無量諸寶王刹一一刹有無邊勝道  
場有無量微塵數如來坐華光王座演說無量契  
經海顯現無邊神通海或一念爲無量劫無量劫  
爲一念或搏無量刹爲一塵破一塵爲無量刹如  
是自在於前身前塵不動不變如善財童子於普  
賢菩薩毛孔刹中行一步過不可說不可說佛刹  
微塵數世界如是而行盡未來劫猶不知一毛中  
刹海次第况一切毛孔耶一切微塵耶如是變現

如是境界既非諸佛之神通又豈菩薩之三昧。余  
吾心實相自然之大用也。有是不思議體。則有是  
不思議用。而善財之所見。亦不過自心之少分耳。  
作是觀者。其雞頭之大城龍華之道樹。乃吾心之  
故物。何足異哉。

又復應知前十一門。悉依此門而得建立。法非實  
相。皆成有漏之因。事屬思議難造。無爲之域。故川  
流望於大海。涯量自殊。臣庶比於輪王。貴賤迥異。  
隋珠終非髻寶。燕石豈並連城。又此十二門。總名  
懺悔。若對三障理事分之前後。頗異。第一至第九

音華情信 卷之四  
皆屬事懺能破業報二障是謂宿累既淨來果自  
空也第十第十一二門雖用妙奢摩他等三止觀  
法觀彼兜率及與龍華尚乃約境觀心亦事亦理  
未到彼岸惟第十二實相一門專依自心不思議  
境起不思議觀還以不思議觀照不思議境惟境  
惟觀惟觀惟境能所泯合惑智雙融方名理懺直  
破煩惱徹法底源三世頓空盡罪邊際若以此智  
遍照諸門則門門十二一卽一切一切卽一全修  
全性全性全修法法圓通塵塵具足一多無礙帝  
網重重難議難思無窮無盡如斯懺悔雅稱佛懷

一法不修名大精進一念不起洞見十方毘盧遮  
那心精通溜普賢彌勒常住其前地湧七寶非外  
莊嚴天雨四花不足稱供修是法者名第一義懺  
悔也

行者得是懺已當念法界衆生封錮未悟須以斯  
道還覺斯民展轉宣傳普濟一切同聞三會之音  
共克二嚴之果報佛深慈堪稱佛子當師子吼發  
海潮音攝伏群邪摧諸外道荷擔如來將墜大法  
於斯末運樹正法幢內照人空外興功德真俗並  
演生佛兩亡其或未階法忍中間自有種種證相

音字惟傳 卷之四  
相似不同若不預明恐至泣歧莫辯大則頓遭邪  
悞小則漸入二乘於無上心悉名顛倒自旣淪溺  
柰衆生何固當虛已從人精思研究而於楞嚴經  
禪經天台止觀法華懺儀諸辯魔處當盡心焉不  
致認賊爲子指砮作璧也能使五陰主人秉燭登  
堂縱有八萬四千魔軍所謂割水吹光不得汝便  
直超寶覺永絕塵囂何慮衣珠不我朗曜因思華  
屋是彼未登願此法門流通無盡

得遇龍華修證懺儀卷第四終

佛弟子袁儼施刻

布袋和尚傳

明州奉化布袋和尚不知何許人自稱契此未詳  
氏族形裁眼鳥罪切脰奴罪切感額瞠腹出語無定寢  
卧隨處常以杖荷一袋囊并破席凡供身之具盡  
貯囊中入鄮肆聚落見物則乞或醢醢魚菹纒接  
入口分少許投囊中時號長汀子一日有僧在師  
前行師乃拊其背僧回首師曰乞我一文錢曰道  
得卽與汝一文師放下布袋叉手而立白鹿和尚  
問如何是布袋師便放下布袋曰如何是布袋下  
事師負之而去先保福和尚問如何是佛法大意

有袋亦出相  
師放下布袋叉手福曰爲祇如此爲更有向上事  
師負之而去師在街衢立有僧問和尚在這裏作  
甚麼師曰等箇人曰來也來也歸宗柔和尚別曰  
歸去來師曰汝不是這箇人曰如何是這箇人師  
曰乞我一文錢師有歌曰祇箇心心是佛十方  
世界最靈物縱橫妙用可憐生一切不空心真實  
騰騰自在無所爲閑閑究竟出家兒若觀目前真  
大道不見纖毫也大奇萬法何殊心何異何勞更  
用尋經義心王本自絕多知智者祇明無學地非  
聖非凡復若平不彊分別聖情孤無價心珠本圓

淨凡是異相妄空呼人能弘道道分明無量清高  
稱道情携錫若登故國路莫愁諸處不聞聲又有  
偈曰是非憎愛世偏多子細思量奈我何寬卻肚  
腸須忍辱豁開心地任從他若逢知己須依分縱  
遇冤家也共和若能了此心頭事自然證得六波  
羅我有一布袋虛空無罣礙展開徧十方入時觀  
自在吾有三寶堂裏空無色相不高亦不低無遮  
亦無障學者體不如來者難得樣智慧解安排千  
中無一匠四門四果生十方盡供養吾有一軀佛  
世人皆不識不塑亦不裝不雕亦不刻無一滴灰

泥無一點彩色人畫畫不成賊偷偷不得體相本  
 自然清淨非拂拭雖然是一軀分身千百億又有  
 偈曰一鉢千家飯孤身萬里遊青目覩人少問路  
 白雲頭梁貞明三年丙子三月師將示滅於岳林  
 寺東廊下端坐磐石而說偈曰彌勒真彌勒分身  
 千百億時時示時人時人自不識偈畢安然而化  
 其後復現于他州亦負布袋而行四眾競圖其像  
 弟子成廣易助刻

傅大士傳

善慧大士婺州義烏縣人也齊建武四年丁丑五  
 月八日降于雙林鄉傳宣慈家本名翁年十六納  
 劉氏女名妙光生普建普成二子二十四與里人  
 稽亭浦捩魚獲已沈籠水中祝曰去者適止者留  
 人謂之愚會有天竺僧嵩頭陀曰我與汝毘婆尸  
 佛所發誓今兜率宮衣鉢見在何日當還因命臨  
 水觀影見圓光寶蓋大士笑謂之曰鑪鞞之所多  
 鈍鐵良醫之門足病人度生為急何思彼樂乎嵩  
 指松山頂曰此可棲矣大士躬耕而居之有人盜



菽麥瓜果大士卽與籃籠盛去日常營作夜則行道見釋迦金粟定光三如來放光襲其體大士乃曰我得首楞嚴定天嘉二年感七佛相隨釋迦引前維摩接後唯釋尊數顧其語爲我補處也其山頂黃雲盤旋若蓋因號雲黃山梁武帝請講金剛經士纔陞座以尺揮按一下便下座帝愕然誌公曰陛下會麼帝曰不會誌公曰大士講經竟又一日講經次帝至大衆皆起唯大士端坐不動近臣報曰聖駕在此何不起大士曰法地若動一切不安大士一日披衲頂冠靴履朝見帝問是僧邪大

士以手指冠帝曰是道邪大士以手指靴履帝曰是俗邪大士以手指衲衣嘗作心王銘曰觀心空王玄妙難測無形無相有大神力能滅千災成就萬德體性雖空能施法則觀之無形呼之有聲爲大法將心戒傳經水中鹽味色裏膠青決定是有不見其形心王亦爾身內居停面門出入應物隨情自在無礙所作皆成了本識心識心見佛是心是佛是佛是心念念佛心佛心念佛欲得早成佛心自律淨律淨心心卽是佛除此心王更無別佛欲求成佛莫染一物心性雖空貪瞋體實入此法

門端坐成佛到彼岸已得波羅蜜慕道真士自觀  
自心知佛在內不向外尋卽心卽佛卽佛卽心心  
明識佛曉了識心離心非佛離佛非心非佛莫測  
無所堪任執空滯寂於此漂沉諸佛菩薩非此安  
心明心大士悟此玄音身心性妙用無更改是故  
智者放心自在莫言心王空無體性能使色身作  
邪作正非有非無隱顯不定心性離空能凡能聖  
是故相勸好自防慎剎那造作還復漂沈清淨心  
智如世黃金般若法藏並在身心無爲法寶非淺  
非深諸佛菩薩了此本心有緣遇者非去來今偈

大阿羅漢難提蜜多羅所說法住記

奘藏葦函

唐三藏法師玄奘奉 詔譯

如是傳聞佛薄伽梵般涅槃後八百年中執師子

國勝軍王都有羅漢名難提蜜多羅

唐言慶友

具八解

脫三明六通無諍願智邊際定等無量功德皆悉  
具足有大威神名稱高遠以願智力能知此界一

切有情種種心行復能隨順作諸饒益化緣旣畢

將般涅槃集諸苾芻苾芻尼等說已所證諸妙功

德及應所行利樂有情諸勝事業皆悉成辦告時

衆曰自今已後無復所爲唯無餘依是所歸趣仁

等當知。有疑可問。時諸大衆聞是語已。舉聲號哭。不能自持。宛轉於地。或起唱言。佛薄伽梵久已涅槃。諸聖弟子亦隨寂滅。世間久空無真調御。今唯尊者爲天人眼。如何復欲棄捨我等。願垂哀愍。少留壽命。尊者慶友慰喻衆言。不須啼泣。仁等當知。世間法爾有生有滅。諸佛如來降伏四魔於壽自在。隨順世故。猶示涅槃。况我今者。豈宜恒住。設隨汝請。亦無利益。當體此意。勿生憂惱。但有疑者。應可速問。諸苾芻等。雖承告示。猶增涕噎。良久乃問。我等未知世尊釋迦牟尼無上正法。當住幾時。尊

者告曰。汝等諦聽。如來先已說法住經。今當爲汝粗更宣說。佛薄伽梵般涅槃時。以無上法付囑十大阿羅漢。并眷屬等。令其護持。使不滅沒。及勅其身與諸施主。作真福田。令彼施者。得大果報。時諸大衆聞是語已。少解憂悲。復重請言。所說十六大阿羅漢。我輩不知其名何等。慶友答言。第一尊者名賓度羅跋囉惰闍。第二尊者名迦諾迦伐蹉。第三尊者名迦諾迦跋釐惰闍。第四尊者名蘇頻陀。第五尊者名諾矩羅。第六尊者名跋陀羅。第七尊者名迦理迦。第八尊者名伐闍羅弗多羅。第九

尊者名戍博迦第十尊者名半託迦第十一尊者  
名囉怛羅第十二尊者名那伽犀那第十三尊者  
名因揭陀第十四尊者名伐那婆斯第十五尊者  
名阿氏多第十六尊者名注茶半託迦如是十六  
大阿羅漢一切皆具三明六通八解脫等無量功  
德離三界染誦持三藏博通外典承佛勅故以神  
通力延自壽量乃至世尊正法應住常隨護持及  
與施主作真福田令彼施者得大果報爾時苾芻  
苾芻尼等復重請言我等不知十六尊者多住何  
處護持正法饒益有情慶友答言第一尊者與自

眷屬千阿羅漢多分住在西瞿陀尼洲第二尊者  
與自眷屬五百阿羅漢多分住在北方迦濕彌羅  
國第三尊者與自眷屬六百阿羅漢多分住在東  
勝身洲第四尊者與自眷屬七百阿羅漢多分住  
在北俱盧洲第五尊者與自眷屬八百阿羅漢多  
分住在南瞻部洲第六尊者與自眷屬九百阿羅  
漢多分住在耽沒羅洲第七尊者與自眷屬千阿  
羅漢多分住在僧伽茶洲第八尊者與自眷屬千  
一百阿羅漢多分住在鉢刺拏洲第九尊者與自  
眷屬九百阿羅漢多分住在香醉山中第十尊者

與自眷屬千三百阿羅漢多分住在三十三天第十一尊者與自眷屬千一百阿羅漢多分住在畢利颺瞿洲第十二尊者與自眷屬千二百阿羅漢多分住在半度波山第十三尊者與自眷屬千三百阿羅漢多分住在廣脇山中第十四尊者與自眷屬千四百阿羅漢多分住在可住山中第十五尊者與自眷屬千五百阿羅漢多分住在鷲峯山中第十六尊者與自眷屬千六百阿羅漢多分住在持軸山中諸仁者若此世界一切國王輔相大臣長者居士若男若女發殷淨心爲四方僧設大

施會或設五年無遮施會或慶寺慶像慶經幡等施設大會咸延請僧至所住處設大福會或詣寺中經行處等安布上妙諸坐卧具衣藥飲食奉施僧衆時此十六大阿羅漢及諸眷屬隨其所應分散往赴現種種形蔽隱聖儀同常凡衆密受供具令諸施主得勝果報如是十六大阿羅漢護持正法饒益有情至此南瞻部洲人壽極短至於十歲刀兵劫起互相誅戮佛法爾時當輒滅沒刀兵劫後人壽漸增至百歲位此洲人等厭前刀兵殘害苦惱復樂脩善時此十六大阿羅漢與諸眷屬復

來人中稱揚顯說無上正法。度無量衆令其出家  
爲諸有情作饒益事。如是乃至此洲人壽六萬歲  
時無上正法流行世間熾然無息。後至人壽七萬  
歲時無上正法方永滅沒。時此十六大阿羅漢與  
諸眷屬於此洲地俱來集會。以神通力用諸七寶  
造窣堵波。嚴麗高廣。釋迦牟尼如來應正等覺所  
有遺身馱都皆集其內。爾時十六大阿羅漢與諸  
眷屬繞窣堵波。以諸香華持用供養。恭敬讚歎。繞  
百千匝。瞻仰禮已。俱升虛空。向窣堵波作如是言。  
敬禮世尊釋迦如來應正等覺。我受教勅護持正

法及與天人作諸饒益。法藏已沒。化緣已周。今辭  
滅度。說是語已。一時俱入無餘涅槃。先定願力火  
起焚身。如燈燄滅。骸骨無遺。時窣堵波便陷入地。  
至金輪際方乃停住。爾時世尊釋迦牟尼無上正  
法於此三千大千世界永滅不現。從此無聞。此佛  
土中有七萬俱胝獨覺。一時出現。至人壽量八萬  
歲時。獨覺聖衆復皆滅度。次後彌勒如來應正等  
覺出現世間。時瞻部洲廣傳嚴淨。無諸荆棘谿谷  
堆阜。平正潤澤。金沙覆地。處處皆有清池。茂林名  
華瑞草。及衆寶聚。更相輝映。甚可愛樂。人皆慈心

修行十善。以修善故。壽命長遠。豐樂安隱。士女殷稠。城邑鄰次。雞飛相及。所營農稼。一種七穫。自然成實。不須耘耨。諸仁者。於彼時中國。界莊嚴。有情果報陳之難盡。具如彌勒成佛。經說彌勒如來成正覺已。爲聲聞衆三會說法。令出生死得證涅槃。第一會度九十六。俱胝聲聞衆。第二會度九十四。俱胝聲聞衆。第三會度九十二。俱胝聲聞衆。若諸國王大臣長者居士男女。一切施主。於今釋迦牟尼佛正法中。能爲佛事。自種善根。或教他種。謂以七寶金銀真珠璧玉香材。鍮石銅鐵木石泥土。或

法住記

五

以繒纒。或以彩畫。作佛形像。及率堵波。若大若小。乃至最小。如指節量。或以香華諸妙供具。若多若少。而爲供養。彼由如是善根力。故至彌勒如來成正覺時。善得人身。於彼佛第一會中。以淨信心。捨俗出家。淨除鬚髮。披著法服。既預聖衆。隨宿願力。便得涅槃。是名第一爲佛事。故種善根者。所得果報。若諸國王。及以臣庶。一切施主。於今釋迦牟尼佛正法中。能爲法事。自種善根。或教他種。謂於大乘素怛纜藏。所有甚深空性相應諸大乘經。謂般若波羅蜜多經。妙法芬陀利迦經。金光明經。金剛

法住記

六

手藏經。首楞伽摩三摩地經。幻喻三摩地經。大神  
變三摩地經。集諸功德三摩地經。逮如來智印三  
摩地經。具諸威光三摩地經。寶臺經。集諸菩薩三  
摩地經。諸佛攝受經。集請問經。梵王問經。善吉問  
經。勇猛問經。能滿問經。海龍王問經。無熱惱龍王  
問經。樹幢龍王問經。寶掌問經。寶髻問經。虛空音  
問經。虛空吼問經。幻網問經。寶女問經。妙女問經。  
善臂問經。師子問經。猛授問經。金光女問經。說無  
盡慧經。說無垢稱經。未生怨王經。締實經。那羅延  
經。佛華嚴經。蓮華手經。千佛名經。無量光衆經。極

樂衆經。集淨華經。大集經。入一切道經。寶幢經。寶  
聚經。寶篋經。彩畫經。高頂王經。如是等大乘經。有  
百俱胝部。黨差別。復有大乘毘奈耶藏。阿毘達磨  
藏。衆多部類。一切皆是菩薩藏。攝復有聲聞三藏。  
謂素怛纜藏。毘奈耶藏。阿毘達磨藏。素怛纜藏。有  
五阿笈摩。謂長阿笈摩。中阿笈摩。增一阿笈摩。相  
應阿笈摩。雜類阿笈摩。毗奈耶藏。中有苾芻戒經。  
苾芻尼戒經。分別戒本。諸蘊差別及增一律。阿毘  
達磨藏中。有攝六問相應發趣等衆多部類。復有  
本生鬘讚。獨覺鬘讚。於如是等正法藏中。或是佛



說。或菩薩說。或聲聞說。或諸仙說。或諸天說。或智者說。能引義利。乃至有能於四句頌。若自誦。若教他誦。若自讀。若教他讀。若自持。若教他持。若自解說。若教他解說。或於法師恭敬供養。或於經卷恭敬供養。謂以種種香。華。幡。蓋。伎樂。燈明。而爲供養。或於經卷。以諸雜絲。囊。屨。纒帶。而嚴飾之。由如是等善根力。故至彌勒如來成正覺時。善得人身。於彼佛第二會中。以淨信心。捨離家法。出趣非家。淨除鬚髮。披著法服。旣預聖衆。隨宿願力。便得涅槃。是名第二爲法事故。種善根者所得果報。若諸國

王及臣庶等一切施主。於今釋迦牟尼佛正法中。能爲僧事。自種善根。或教他種。謂諸苾芻。苾芻尼衆。或次第請。或隨緣請。於月一日。或月八日。或十五日。設齋供養。或往寺中。若供養一。若供養衆。或作給侍。或有供養修靜慮者。或有供養諸說法者。或見有人。欲於正法學習。流布。從師聽受。不作留難。施其所安。無令怯退。或設五年無遮施會。或施四方僧。或施寺舍。及坐卧具。或施鐘磬。或施園林。如是等類。供養僧衆。彼由如是善根力。故至彌勒如來成正覺時。善得人身。於彼佛第三會中。以淨

信心捨離家法出趣非家淨除鬚髮被著法服既  
預聖衆隨宿願力便得涅槃是名第三爲僧事故  
種善根者所得果報

爾時慶友大阿羅漢爲諸大衆廣說如上事已以  
神通力於大衆前身并虚空高七多羅樹示現種  
種不可思議大神變事令所觀衆增進勝道時彼  
尊者現神變已卽於空中結加趺坐捨諸壽行及  
諸命行入無餘依般涅槃界先定願力火起焚身  
於虛空中雨身遺骨時諸大衆悲歎希有競收遺  
骨起宰堵波以諸香華寶幢幡蓋妓樂燈明常爲

供養此法住記古昔諸師展轉相承誦持不忘爲  
令一切國王大臣長者居士諸施主等了達因果  
厭生老病死芭蕉幻醎泡沫之身修諸勝業於當  
來世逢事彌勒解脫煩惱得大涅槃生愛樂故於  
佛正法護持建立令久不滅

大阿羅漢難提蜜多羅所說法住記終

音釋

軻音加切

法住記流通功德所冀四恩三有法界親冤同  
悟三寶因共履一乘道遇十六尊者於此世界  
內親領指歸讚百千妙偈於宰堵波前大施神

用龍牽樹下罄聞三會之圓音彌勒佛前得預  
 一生之授記先定願力後起度生伏願  
 頂戴受持咸植現生之勝利見聞隨喜悉蒙後  
 劫之悲臻千佛會中轉次摩頂者 時

皇明萬曆戊申臘月佛成道日如鑑和南謹識

橋李奉

佛弟子錢士明

盟手焚香拜書

秀水縣楞嚴寺現前靜室

比丘如鑑捐貲刻



